



Авурсса къатрайну абад дунни цалла цла

Сунбатлал шярвасса гъунар бусса архитектор Хажикъурбан Хажикъурбанов кудминнал учай: «Ванал сагъну унува тивтгуссар цанма алжаннунунсса ххуллу», – куну. Дагъусттаннайсса ацунния ливчусса мизитирттал проекту дурссар Хажикъурбаннул

12
лаж.



ШРШ

№11
(2229)

22 МАРТ 2024 ш.

РЕСПУБЛИКАЛУЛ ЖЯМАТИЙССА ВА СИЯСИЙССА ККАЗИТ

Кказит буклай бивкссар 1917 ш.
Цунил итабакълан бивкссар 1991 ш.

Аьрасатнал Президентнал инсантурайнсса лаизаву



В. ПУТИН: ХIурмат лавайсса аьрасатлутал! Аьзизсса дустал!

ХIакъину дунни Аьрасатнал Президентнал бувчIавурттал официалсса хIасиллу. Къуртал хъунни жула билаятрангу, жяматрангу, инсантурангу хъинну агьамсса бувчIавурттал кампания.

Гьарца кандидатнал бия балжисса проблемартту дузал баврин хасьсса цаламур ххуллу. Циняв чIурду буллуминнал конструктивсса предложениертту, циняв пикри-зикрирду чара бакъа ишла банну жула аьмсса давриву билаятрал лябукку шаврил мурадрай.

Ларгсса кампания дия чIурасса ва хъинну жаваблувсса, цанчирча жува язи бувгъуссар Аьрасат ттинияр тихунмайгу хъхьичIунмай бачинсса ххуллу, бувчIуссар жулагу, жула оьрчIалгу ялун бучIантIумур. Му иширал мяна дурчIунни бувчIавурттайн бувкIсса чIявусса инсантуран. Уттигу цал барчаллагь тIий ура чIурду булавривух гьуртту хъусса цинявнхь, чIурду цуманакху булурчагу. Яла агьаммур, зу исват бувссар зува хIурмат буллай бушиву гражданинал буржирал, кыматрай бушиву ва зула чIу, гьарца зул чIунил тIурча, дуссар хъуннасса мяна.

«Жува ца кулпат бушиву ккаккан бунни»

Барчаллагь увкунни бувчIавурттал чIумал уртакъну бюхъулий зий бивкIун тIий. Бувсунни, гихунмайгу Аьрасатнаву экономикалия байбивхъуну, культуралийн бияннин, уртакъну зунссар тIий цала вихшаласса инсантал. Путиннул вихшаласса инсантураву бия культуралул, элмулул вакилталгу, машгъурсса спортсменталгу. Аьмну 544 инсан. Ва дастгалува СВО-лийсса Аьрасатнал цалчинма Виричав Нурмахаммад ХIажимахаммадовлул нину

Ахир. 3 лаж. →

Март зурул 20-ний Владимир Путин Кремлилул Хъунмур двоьреправу хъунаавкъунни цала вихшаласса инсантурашал.



Аьзизсса дустал!

Барчаллагь хъуннав зун кабакъаврихлу. Ттун мунил мяна хъуннассар, бувчIавурттай формальныйсса ххувшаврияргу. Ва кабакъаву хъанахъиссар жула билаятрал политикалул ва экономикалул ххуллуцIунсса кабакъавуну.

Цаппара махъру чинна циняв даражардал бувчIавурттал комиссиярттал давурттал хIакъиравугу. Муданма кунма, зу зий бияв тIайлану, зула даву кIулну, гласностьрал принципирттайну ва закондалуцIун бавкъуну, жула тарихрал территориярттай избиркомирттал члентал къущу тIий бия чIурду булайминнан эьратну, сивсуну.

Аьзизсса дустал!

Барчаллагь вихшала душиврхлу. На бартбигинна ттушцава бюхъаймур, вихшала тIайла дацIан даншиврул. БувчIлай бур, ва кушцуйсса вихшалалул лахь дуллалиссар Аьрасатнахлусса, жула агьалинал узданшиврухлусса жаваблувшивугу, ттуяту ва жул шалла командалия тIалав дуллалиссар ттинин дурминнуяргу чIярусса давуртту ва мюнпатну зузаву.

Жушцава шаймур буванну уттигъанну Рисалалуву гьаргану ихтилат хъусса хъунисса национал проекту бартдигин.

БувчIавурттал ккаккан бунни Аьрасат хIакъину бушиву ца хъунмасса ва бавкъусса кулпат. Бачинну цацIу жува язи бувгъусса тарихрал ххуллийх.

ХIадур бувссар ХI. АьДИЛОВЛУЛ

КъюмайтIутIи бугъаврил масъалартту ххал бивгъунни

Мартрал 18-ний Къизлардай Аьрасатнал экономика лядуккан даврил министр Максим Решетниковлул каьлувшиврий хъунни къюмайтIутIи бугъаврил ва чахир дуккан даврил масъаларттан хас дурсса батIаву.



Максим Решетников

АьФ-лул Минэкономразвитиялул бакIчинашал архIал республикалийн бувкIунни Аьрасатнал экономика лядуккан даврил министрнал хъиривчув Сергей Назаров, Аьрасатнал финансирттал министрнал хъиривчув Алексей Сазанов, СКФО-лул социал-экономика лядуккан даврил департаментрал директор Игорь Храмовский, «ВЭБ.РФ» идаралул председателна хъиривчув Даниил Алгульян ва цаймигу.

Хьамаллурахь аьла-ссалам буллалисса махъ лавхъунни Дагъусттаннал бакIчи Сергей Меликовлул. Ванал барчаллагь кунни Максим Решетниковлухь Дагъусттаннах къулагъас дулла-лаврихлу.

Сергей Меликовлул бувсунни махъсса шанна шинал мутталий къюмайтIутIи бугъаву хушиву Дагъусттаннал экономикалул ца агьамсса бутIану, ванил кумаг буллай бунутIий цаймигу производстварду лядуккан дуван.

Максим Решетниковлул кIицI бунни билаятрал къюмайтIутIи бугъавриву республикалул бихълахьисса захIмат. АьФ-лул экономикалул министрнал тIимунийну, хIакъинусса къини АьФ-лул Минэкономразвитиялул къулбасру дурну дур 5 соглашениялий – 4

Дагъусттаннал идарартташал ва 1 Краснодардал улкулудидаралушал коньяк дуккан даврил иширттал хIакъираву.

БатIаврий къюмайтIутIи бугъаврил ва чахир дуккан даврил хIакъиравусса махъ лавхъунни региондалул ХIукуматрал председател Аьбдулмуслим Аьбдулмуслимовлул.

Ванал бусаврийну, къюмайтIутIи бугъавриву хIакъину зий бур 250 ишбажаранчишиврул объект. Аьрасатнал къюмайтIутIул багъирдал шала лагрулул 27% хъанай бур республикалул къюмайтIутIул багъирдал бутIа. 2023 шинал хIасиллайн бувну мунил лагру дур 27 азарунниха лирчусса гектарду.

ДукIу республикалий ларсун дур 282,7 азарда тонна къюмайтIутIул бакIлахъиялул. Аьрасатнал ларсьсса цинярда къюмайтIутIул бакIлахъиялул 36% республикалул лавсун бур. БакIлахъиялул 70% тIайла бувкун бур санакъулу дуван (на переработку).

Премьер-министрнал бувсунни къюмайтIутIи бугъаврил хIакъиравугу. Дагъусттаннай пландалий бур 2035 шинайннин къюмайтIутIул багъирдал лагру диян дуван 34 азарда гектардануцIан. Ларгмур шинал республикалий дургуну дур 845 гектар къюмайтIутIул, гьашину дугъантIий бур 1264 гектар.

Аьбдулмуслим Аьбдулмуслимовлул личину бувсунни цIусса къюмайтIутIул багъру бугъаврил инвестпроектру бартдигъаврил масъаларттая. Проектру бартдигъин тIий бур 2025-2026 шинардий.

БатIаврий махъру лавхъунни АьФ-лул Минэкономразвитиялул, АьФ-лул Минсельхозрал вакилтуралу.

ХIадур бувссар ХI. АьДИЛОВЛУЛ

Бувчавуртту

Бувчавурттая ва Президентная

Шанасса бувчавуртту уттинин хьуминнух бурувгун ляличисса дия. Ттун къадакИнири тачАв жула инсантал укун чялишну, цивпа рязину, байрандалийн кунма, гьирарай бувчавурттайн най. Чунну дикАйссия инсантал гужирай чЮ булун буккан буллалисса. На навагу ва ххуллух ляличисса гьавасрашал бувкИра чЮ булун «Морячок» тИсса оьрчАл багъраву тИвтГусса ттула участокрайн, шак тИй къабивкИра нава тИайласса хЮкму бувшиврий, яла лайкманакху чЮ буллай бушиврий. Бувчавуртту дайдишиннинма Владимир Путин гьаншиву чАлай бия. Аьрасатнал халкъуннача, хаснува дагъусттанлувтурачА, В.Путиннул сий дур, мунайссса вихшалагу, умудругу хьунисса бур.

Цанма Президентнангу яхИкьирят дусса, къучагьсса Дагъусттаннал халкъ дакИнил лавьсса бур. Хьиннува ххирар Путиннул лакгу, лакран Путингу. Ттул хьисвагу шак бакъая аьрасатлувтурал, дагъусттанлувтурал Владимир Путиннул чЮ булунтИшиврий. ХИакьину шалагу запад Аьрасатнайн данди бавцусса, жула билаятран бигьа дакъасса чЮмал, жуна аькбил-

Шанна къинилул мутгалий, мартрал 15-17-сса гьантрай, шалагу билаятрай най дия Аьрасатнал Президент увчАлачИсса мьялчинсса выборду. ЧЮрду буллуну къуртал хьуннин Дагъусттаннал избирательтурал сияхИраву ия 1 708 189 инсан. ЧЮрду буллунни 1 547 370 избирательнал. Миннава Владимир Путиннул чЮрду буллунни 1 425 408 дагъусттанлувал. (92, 12%).



Зарема Буттаева

манда Путина» тИсса наградалун. Лайкьну чАлачИма кандидатнахлу чЮ булун Бадуржигьан бувкИунни Каспийскалийсса участокрайн. Цуппагу, цила зумуну, чумартну, шиккусса инсантурал зума итадакьин дукан-хИачанмургу ларсун.

МахИачкъалаливсса 1084-мур участокрайн чЮ булун увкИунни Информациалул ва печатьрал агентствалул каялувчи Аьбдуракъ Жамалуттинов.

«Илчи» кказитрал хьунама редактор Руслан Кьардашов-



Камил Давдиев

кулпатру.

– ХИакьину, билаятрай захИматсса тагьар дусса чЮмал, гьарица инсаннал цала граждан позиция ккаккан бан аьркинссар. Жуна аьркинссар, ва оьлуркъусса тагьарданувагу буккан бувну, Аьрасат хьхичИунмай бачин бансса, Аьрасатнал даража бюхттул бансса каялувчи, – увкуна чЮ булун увкИсса Аьрасатнал лайкь хьусса строитель Зиябуттин ХИажимирзаевлул.

МахИачкъалаливсса Элмийсса аграр центрдалийсса бувчавурттал участокрайн чЮ булун бувкИунни ДР-лул Шуллушиву дуруччаврил министрствалул агьалинан медициналул кумаг байсса управлениялул чИасса отделданул хьунмур Рига Мурачуева.

Чялишну гьуртту хьунни бувчавурттай кЮлшивуртту дулаврил, культуралул идараттал зузалт. Дагъусттаннал Техникалул университетравуssa участокрай чЮ буллунни экономикалул ва управлениялул информациялул системарттал факультетрал декан Земфира Раджабовал. Цала участокрайн лайкьма кандидатнахлу чЮ булун цалчинминнавах увкИунни МахИачкъалалал 49-мур школалул директор, ДР-лул КЮлшиву дулаврил отличник Аьбдулкарин Айгунов, студенттурашал бувкИунни Каспийскалийсса цала участокрайн С. Орджоникидзел цанийсса Машиностроениялул ва сервисрал колледжрал преподаватель, экономикалул элмурдал кандидат Аьйша Абачараева, цала-цала участокирттай чЮрду буллунни Дагъусттаннал Чичултрал союзрал лакрал секциялул каялувчи Супиян Оьмаровлул, «Дагестан» ГТРК-лул лакрал вещаниялул хьунмур Тамара Закарьяевал, Дагъусттаннал халкъуннал артисттал Санягь Рамазановал ва Загьидат Муслимовал.

Дагъусттаннал избирательтураву яла оьрмулул хьунама ия Буттал КИанттул цанийсса Хьунмасса дяьвилул участник, 100 шин хьусса Ибрагьим-Паша Садьков. Ванал чЮ буллунни Новый Кяжулайрайсса участокрай.

Ряхра шинайсса уттигу, 2030-ку шинайн иянин, 87,28% инсантурал чЮрду буллуну Аьрасатнал Президентну увчИунни В.В. Путин. ДакИ дарцуну бура ванал каялувшиндаралу Аьрасатнал билаятрал иш бачинтИшиврий, гуж-къудрат ххи хьунтИшиврий. Амин.

Андрiana Аьбдуллаева



Камил Саидов кулпатрашал рациялул вирттавал нинухьру, кулпатру, оьрчЮру.

Аьрасатнал Президентнал бувчавурттай лайкьну чАлачИма кандидатнахлу чЮ булун бувкИунни ДР-лул Халкъуннал Мажлисрал Председательнал хьиривчув, Дагъусттаннал региондалийсса «Справедливая Россия – За Правду» партиялул отделениялул каялувчи Камил Давдиев, ДР-лул Халкъуннал Мажлисрал депутат Артур Ибраиллов.

КЮрххила МахИачкъалалал Советский райондалийсса 1125-мур участокрай чЮ буллунни Дагъусттаннал культуралул министр Зарема Буттаевал.

– ХИакьину жува хьуннасса агьамшиву ва жаваблвшинна дусса ша ласлассару. Жула бучАнтИмунихлу чЮрду буллалиссару. На оьвчаву дуллай бура жула халкъуннайн анавар къабувкун, тИайласса хЮкму бувара тИй, – увкуна ванил.

АхИмад-Хан Султаннул цанийсса «Аэропорт Махачкала» АО-лул генеральный директор Саид Рамазановлул буллунни чЮ 1007-мур участокрай. Ванал нину Бадуржигьан Рамазанова чЯвучин кЮлссар ччя-ччяни хьусса операциялийсса аьралитурал кумаг буллалаврийну. КИиц лаган, Бадуржигьан лайкь хьуссар «Ко-



Сапигат Мазаева



Саид Рамазанов

лулгу буллунни чЮ Аьрасатнал Президентнал бувчавурттай. Ва дакИ дарцуну ур агьалинал хьуннасса вихшала дирхьусса В. Путин бакИчину жува цацЮ хьусса аьралий операциялий хьув хьунтИшиврий, билаятрал экономикалул, элмулул ва кЮлшивурттал даража гьаз хьунтИшиврий. Ва чЮмул иш бушиврий.

Цила каялувшиву дуллалисса МахИачкъалалал 54-мур школалул коллективрашал чЮрду булун бувкИунни хьусса аьралий операциялий цалчин Виричувнал цА ларьсса НурмахИаммад ХИажимахИаммадовлул нину Сапигат Мазаева. Виричувнал ппу, шанна Къучагьшивурл ордендалул залу Энгельс МахИаммадовлулгу буллунни чЮ Аьрасатнал Президент увчАлачИсса выбордай. Цалчин чЮрду буллуннавах бия хьусса аьралий операциялий



Бадуржигьан Рамазанова

жан дуллусса Къучагьшивурл ордендалул залу Асхад ХИажиевлул нину Санягь, МахИмуд Чанановлул нину Шамсият ва цаймигу. Вайннан шинниаргу ххуйну бувчАлачИхьунсар цанасса тагьарданий цукунсса бакИчи аьркинссарив жуна.

Бувчавурттай гьуртту хьунни мукуна Дагъусттаннал муфтий, шайх АхИмад Апанди ва ванал кулпат Айна.

«Шалва кулпат архАл – бувчавурттайн» тИсса акциялул лагрулий шаллусса кулпатру бувкИунни чЮрду бичин. Миннавах бия Дагъусттаннал миллатрал политикалул ва диндалул иширттал министр Энрик Муслимовлул, Дагъусттаннал жагьилтурал иширттал министр Камил Саидовлул, Дагъусттаннал хьуслил ва аьршарал арардал министрнал хьиривчув Эмиль Ттаттаевлул

БувчІавуртту

ЧІурду буллунни билаятрал лайкъсса бучІантІимунихлу


Ца утгарашинна дия Аьрасатнал Президент увчІаЧІисса махъра-махъсса къини Гъумук. Агъали ва ца миллатрал байрандалийн кунма най бия ЧІурду булун.

Миллатрал лаххиялу ватандалухасса, лакку аьршарахасса балайрдугу тІий нанисса магъирлугърал зузалтрал ЧІурду булун даКІний-мазрай къабивКІсса инсантурал даКІурдивунгума гъавас бутлай бия. Ва куццуй, ЧІурду булайсса участокрайн бияннин вайннал дастта лахъи дурккуна.

– ХІакьину ва яргсса, гъилисса, ххарисса, гъарца чулуха музыкалул, балайрдал, къавтІавурттал шадсса ЧІурду баллалисса къини жува буру Аьрасатнал Президент



Юсуп МахІаммадов



хъанай дур Западрал чулуха. ВанигъачІаврил хъхъичІсса агъалинал цашиву хІакьину чІалай дур жула райондалий. Билаятрал бучІантІимунил ялув хІакьину цайрасса жаваблущинна дурчІлай, инсантал гъирарай най бур шалусса коллективирдашал, кулпатиртгташал, – тІий ур Юсуп МахІаммадов.

Аьрасатнал Президентнал бувчІавуртту нанисса гъантрай Лакрал райондалийн увкІун ия ДР-лул Халкъуннал Мажлисрал депутат Марат Илиясовгу. Ванал цала ЧІу буллуна ГъунчІукъатІрал избирательный участокрай.

Лакрал райондалул ТИК-рал Лхъунама Илияс ХІажиевлул бусаврийн бувну, гъашину Аьрасатнал Президент увчІин бувкІун

увчІлай. Нагу булав ттула ЧІу яла лайкъманахлу, дакъаврихлу, ххувшаврихлу, жулва билаят гъарца чулуха хъиннува цаьк шаврихлу, агъалинал ахІвал лавай шаврихлу, – тІий бур райондалул Хъунисриннал советрал член Бадиулжамал Мусиева.

ЧІурду булун бувкІминнансса тяхъашиврун Гъумучиял Магъирлугърал школалул оьрчІалгу хІадур дурну дия ЧІири-къирисса концертрал программа. Шаллу дурна миллатрал къавтІавуртту, ватандалухасса балайрду. Дурккуна буттал улкхуасса назмурду.

ДР-лул бакІчи Сергей Меликовлул амрулийн бувну, Гъумукун бувчІавуртту цукун най дурив ххал дуван бувкІун бия райондалул куратор, республикалул культуралул министр Зарема Буттаевагу.



– Тааьнну бур агъали чялишну цала граждан хІучча ккаккан буллай чІалай. Билаятрал ялун бучІантІимур хІакьину жула КІунттихъ бушиву бувчІлай,

ЧІявусса агълу най бур ЧІурду булун, – увкуна Зарема Буттаева.

Райондалул бакІчи Юсуп МахІаммадовлул бувсуна гъашину Аьрасатнал Президент



ГъунчІукъатІрал бувчІавурттал участокрай. Шикку ЧІурду буллуну бур шантуршуннийн бивсса инсантурал

увчІаЧІисса выбордай тачІав бакъачІин чялишну гуртту хъанай бушиву райондалул агъали.

– Жула Аьрасатнал агъалинал оьттуву тартсса хасият дур билаятрал ялун нигъачІаву нанисса чІумал цачІун батІайсса. ХІакьину ва нигъачІаву асар

бур 96 процент агъалинал, 7307 инсан.

Вайннава 93 процент ЧІурдал буллуну бур билаятрал хІакьинусса Президент В. Путиннухлу.

Ккалли къабувсса хъуну бур 33 бюллетень.

Зулайхат ТАХАКЪАЕВА



Щардал шярваллил бакІчи Мирослав Ибрагъимов Аьрасатнал Президентнахлу ЧІу булун увкІун ия кулпатрашал

Аьрасатнал Федерациялул Президентнал БувчІавуртту нанисса шаннагу къини КІундив къавхъунни закон, низам зия дурсса, ххуттава бувсса иш. Шяравуасса ва шагърулия хасну ва иширайн бувкІсса инсантурал шаллу бунни гражданин хІисаврайсса цайвацца бурж.

БувчІавурттал участокрайн яла-яла ЧІявусса халкъ най бия цалчинмур къини – мартрал 15-ний. Вай кьинирдай шярвун, райондалия бикІу, шагърулия бикІу, ЧІявусса бусравсса хъамалгу бувкІунни ялтту буккан.

Цинявпагу ца хъуну, билаятрал бучІантІимунихлу ЧІурду буллунни КІундиннал дянивмур даражалул школалул

БувчІавуртту КІундив



учительтуралгу.

КІундиннал шяраву амну буллунни 561 ЧІу. Вайннува В.В.Путиннухлу – 529, Н.М.

Харитоновлухлу – 19, Л.Э. Слущкийхлу – 7, В.А. Даванковлухлу – 6.

Бадрижамал АБЛИЕВА

БувчІавуртту

Ккуллал райондалийсса бувчІавурттая

Шалагу республикалий Шкунна, Аьрасатнал Президентнал бувчІавуртту Ккуллал райондалийсса шархъавугу ларгунни цукунчІавсса низамрава бувксса КІантурду къавхъуну. Гьашинусса бувчІавуртту цукун най дурив ххал дуван лакрал шаннагу райондалийсса шархъавун бивунни «Илчи» кказитрал зузалт.

Ккуллал райондалул ТИК-рал председатель МахІаммад АхІмадовулл кІицІ лавгуна, гьашину чІавусса инсанталгу гьуртту хъуну, лавайсса даражалый ларгшиву Аьрасатнал Президентнал бувчІавуртту.

– Ва ххуллукъ инсантал хъинну жаваблуну най бия Аьрасатнал Президентнахлу чІурду булун. БувчІавуртту шанма гьантлий най душивриягу агьалинан ва бувчІавурттал участокирттай зузиминнан хъуннасса къулайшиву дия. Райондалийн чІурду булун букІлай бия, республикалия бакъассагу, Аьрасатнал шагьурдай ялапар хъанахъисса ватанлувталгу. Чялишсса гьурттушинна дурна бувчІавурттавух райондалул азарханалул зузалтралгу. Вай шанмагу гьантлийн хъар хъанай бия билаятрал бучІантИмур. Цинявннал умуд бия бюхъу-цакъ бусса, оьлуркъусса тагьарданува жула ХІукумат дуккан дансса каялувчи увчІинсса. Мукун хъуссар тІийгу ура, – увкуна МахІаммад АхІмадовулл.

Вачавсса бувчІавурттал участокрай, ххишаласса сияхравун бутансса аьрзагу чивчуну, нагу булав ттула чІу.



Халун Давдиева



Ризван Оьмаров



Рабият Оьмаева



Хъусрациял фермалий чІурду булла

пенсионер Качар Акаевагу. – На мудангу, бувчІавурттавух гьуртту хъуну, ттула граждан позиция ккаккан байссар. ХІакъину билаятран захІматсса чІун дур. Мунийн бивну, бачияра ккаккан даннуча жула цашиву, – увкуна ванил.

Хъусрациял школалул директор Гулайбат ХІажиевал бувчІавурттан хасъсса лишандалий бивну бия ххуйва-ххуйсса торт ва буркив. Вай хъинну бусрав хъуна зума итадакълакъийни. БувчІавуртту нанисса шаннагу кьини комиссиялул члентурал ва ялув бацІаву дан бувкІсса ихтияр дуручай органнал зузалтрал зумарду итадакъинсса дукрарду дурна Издаг Саидовал.

– Барчаллагь учин ччай



Хасъсса аьралий операциялий гьуртту хъанахъисса аьралитурал янна дурухлахисса Майсарат Багьавуттинова душнищал

ЧІайннал шяравусса Культуралул къатлуву тІиртІусса участокрай чІу булун увкІун ия «ЧаннацІуку» кказитрал корреспондент Арсен Абдуллаев.

Бивру жу Ккуллал райондалий чІавусса чІурду буллусса Ккуллал шяравусса участокрайнгу. Жу бувкІсса ппурттуву чІу булун увкІун ия хасъсса аьралий операциялий къъчагьну жан дуллусса Чувшиврул ордендалул кавалер Чаннанов МахІмуд тарбия увсса, ванал ниттил ппу Ризван Оьмаров.

Хъиривмур аьрхи хъуна жул Хъусрациял шяравун. Шикъусса бувчІавурттал участокрал председателъну ия Марсел Сулайманов. ХІукуматрал бакІчинахлу чІурду булун бувкІун бия СВО-лий чувшиврий

жан дуллусса, Къучагъшиврул ордендалул кавалернал нину Рабият Оьмаева ва цІанасса чІумал хасъсса аьралий операциялий гьуртту хъанахъисса Назим Оьмаевулл ппу МахІаммад Оьмаев. Ва, оьрмулул угъара хъуну унугу цацІанма шаппай чІунил хъирив бучІаннин къаавцІуну, цува увкІун ия участокрайн.

– Вин захІмат къахъуншиврул, жу вичІан шаппай бучІантІиссияв, инава увкІунна, – увкукун, МахІаммадул: «На арс учІаннин къанкъану ялуьлан аьркинссара, яхІ булла ия ура. УвкІра ттула бурж биттурбан, билаятрал бакІчинахлу чІу булун. Хъуннасса вихшалагу дур агьалинал лайкъсса кандидатнахлу чІурду булунссар тІисса», – увкуна.



«Илчи» кказитрал зузалт Хъусрахъ бувчІавурттай

Шиккува кІицІ лаган, Назимлуя жун утгинингу цикссагу ххуйсса хаварду баяйва. Ванашал архІал къуллугьрал бурж бартбигьлай бивкІсса жула лаккуоьрчІуру бусли бия, Назим хъинну захІмат ххирасса, канива букъаккайсса пиша бакъасса, аьралитуралашалгу авкъусса, хъинну ххуйсса инсан ур тІий.

Оьрмулул къулайсса шартІру дакъасса окопирттаву ялапар хъун багъсса аьралитал, Назимлул кумаграину, бувцуну ттукІгу, чІумуйнуса ялапар хъунсса шартІругу дузал дурну, аьралий бурж бартбигьлай бур. Лагма-ялттусса окопирттаву ялапар хъунсса шартІру дакъар тІий аьрзираисса аьралитурал

командир ивкІун ур: «Бургияра ва дагъусттанлувнал дурсса давуртта, вагу зу кунасса аьраличуври, ваная эьрат ласияра», – тІий. Укун яхІлувсса буттал арс ур Назимгу.

Буттал шяраву, Хъусрахъ, чІурду булун бувкІун бия «Илчи» кказитрал отделданул редактор Зулайхат Тахакъаева ва хъуннасса аьлимчув, шаэр Абачара ХІусайнаевулл душнил душ Камила Абакарова.

Шамилчинсса кьини чІу булун бувкІун бия оьрмулул 90 шинавусса Халун Давдиева, ДР-лул Халкъуннал Мажлисрал депутат Камил МахІаммадовичлул нину. БувкІун бия Хъусрациял жяматран ххирасса ва бусравсса

ура вай душаврал бувсса захІматрахлу. Шяравалил жяматрал ххуйсса гьурттушинна дунни бувчІавурттал давривух. Оьрмулул бугьарасса, цІуллушиврул ссуссу къушиву дусса инсантурачІан шаппай занай бивкІру, минналгу чІурду булуншиврул. Бивру машайсса хІухчалтрачІан ва дояркахъачІан, – увкуна Марселлул.

Цума-цагу инсаннал цала чІу булунни ххуймунийн, ххаришиврийн вихшала дирхъуну. Аьрасат – гуж бусса билаятри. Билаятрайсса оьрму ялуьлун ххуй хъуннав, хІукуматрал багьу-бизу цакъ хъуннав.

Имара САИДОВА

Бувчавуртту

Цуссалакрал райондалий ва Цуссаминалий бувчавуртту лавайсса даражалий хьунни



Маматли Хамзатов

Мартрал 16-нний жу «Илчидул» хьунама редакторнашал лавгру Цуссалакрал райондалул Цуссаминалийн, яла райондалийнгу, бувчавуртту нанаврил хАлкхазия ххал дуван.

«Новостройрал» хьунмур идаралий бия ТИК-лул хьунмур пункт. Шикку бия райондалул циняв УИК-ирдай каялувшиву дуллаи ТИК-лул председатель Аьли Исрапилов ва цаймигу зузалт.



Артур Исрапилов



Цуссалакрал шараваллил УИК-рай

лийсса Чапаево шярваллил школалийсса АхМадхановуллал УИК-райн. Ванил председатель Жамал МахАмадовулл бусаврийну, жу бияннин чурду булун цалсса бувкун бия 450-ннаха ливчусса, ялагу найна бия. Шикку цаламур чу буллуна Артур Исрапиловул. Сияхирттайну чурду булун аьркинну бия 1241 инсаннал, булун тий бур сайки 90-95 процент жяматрал.

Шиккува жу кул хьуру Чапаево шярваасса хасьсса аьралий операциялул гьурт-тучи, цунциияртту хьуну, хьин хьанахьисса Кьабиев

Хусайннушал.

Цуссаминалия, бувкIру Цуссалакрал райондалийн. Хьунабавкьуру райондалул бакIчи Маматли Хамзатовлушал. Ванал бувсуна райондалийсса бувчавурттаяту: 15 сьятраву чурду буллуна бур 46 % райондалул жяматрал, бувчавурттай аварасса ишру хьуну бакьар. Лавгру Цуссалакрал шярваллил УИК-райну. Тиккусса чурду булвалрил тагьардания бувсуна райондалул Жаматийсса советрал председатель Зайнулла Мирзоевлул.



Аьли Исрапилов

Ванал бусаврийну, бувчавуртту ххуйну най дия, халкк чурду булун занай бия, аварасса

ишру хьуну бакья. Яла бувкIру Цуссамина-



Хусайн Кьабиев

Чапаевкаллал кьучагъ

Кьабиев Хусайннул кьуртал бувну бур МахАчкьалалал Автодорожный университет. Зий ивкIун ур Москвалив «ПИК» тIисса строительствалул компаниялий.

2023 шинал июндалий хуш-рай лавгун ур СВО-лийн. Талай ивкIун ур Херсоннал областьрай. Гьашину, январьданул 12-нний, Казачий лагерь тIисса шярву беспилотник пIякь куну, ванал ччаннай ва ца каний хьуну дур

захIматсса цунциияртту. Ванашала архIал талай ивкIсса Краснодардаясса аьраличувнайгу хьуну дур цунциияртту. Хусайннул, цува ччаннай ацан хьанай акьанува, цала гьалмахчув ххюрху увну, уккан увну ур беспилотникру пIякь тIисса кIанава кьатрал махьун. Вай кIиягу увцуну ур Виноградово шярвусса полевой госпитальданийн, тикку аьркинсса медициналул кумаггу бувну, Хусайн вертолетрай

иан увну ур Симферопольлайн, Аьралий госпитальданийн, тикку операция бувну бур. Утти шийх, МахАчкьалаливгу, бан най бур ванал никирай цамургу операция.

Хусайннул дуснайгу операция бувну бур Краснодардай.

Утти вай кIиягу гьантIий ур Симферопольлайсса аьралий госпитальданийн, ххал буван хьин хьуну бурив ягу бакьарив. Хьин хьуну бакьахьурча, итабакьин тIий бур шаппай.

Укунсса ур жула Чапаевкаллал кьучагъ.

ХI.АЬДИЛОВ

Райондалул жяматрахь барчаллагъ увкунни

Бувчавуртту кьуртал хьуну махь мунил хIасиллу дуллаи, жяматрахь барчаллагъ увкунни Цуссалакрал райондалул бакIчи Маматли Хамзатовлул.

– Шанма гьантIий най дия Аьрасатнал Президент увчIлачIисса чурду бичаву. На рязину ура жула райондалий 93% агьалинал бувкIун тIий чурду бичин.

Шалагу билаятрай Владимир Путиннухлу чIявуминнал чурду буллуна, цунилгу ва Президентну увчIаврил исват бунни Аьрасатнал халкьуннал ванайн хьуннасса вихшала душиву.

Жува чурду буллулар гуж-цакь бусса, шищачIав лахIан дан кьашайсса державалухлу.

ЧIярусса шиннардий билаятрай каялувшиву дуллаи, хьунмасса опыт салкь хьусса, аькьилсса, куртIсса ва гьарица чулухасса кIулувшивуртту дусса Президентнал гьаз бантIиссар билаятрал даража. Му кIулу тIийри халкьуннал ванайн вихшала дирхьусса.

Хьунмасса барчаллагъ избирательтурал комиссиярттан ва наблюдательтуран, бувчавуртту тIайлану, закондалул ххуллий тIайла дуккан хIарачат бувну тIий. Барчаллагъ оьрмулул бугьарасса инсантуран цала цулуллу-сагьшиврул тагьардану, бюхьу чанну бушиврух кьабурувгун, избирательтурал участокирттайн бувкIун, чурду бивчусса. Барчаллагъ райондалул захIматрал коллективирттан, жагьилсса ва чIявусса оьрчIру бусса кулпартиттан, жяматрал ва диндалул ишккаккултран, спортсментуран ва укунмасса инсантуран бувчавурттай чялишну гьуртту хьусса, барчаллагъ низамрал кьаралданий бавцуну бивкIсса полициялул зузалтран, ва давриву кумаг буллаи, вания буслай ивкIсса гьарица инсаннан, – увкуна ванал.

Най бур наркотикирттайн кьаршисса акция

Мартрал 18-нния 29-ннийн бияннин Цуссалакрал райондалий най дикIантIиссар «Сообщи, где торгуют смертью» тIисса Шалагу Аьрасатнал акциялул цалчинисса ятIап.

Ванил мурад бур закондалуцун кьабавкьуну наркотикру ишакаш баврийн кьарши бацIаврил давурттаван жямат кIункIу баву, наркотикирттаун багьминнан кумаг баву, хьин баврил ва реабилитациялул хIакьираву бувчIин бавуртту даву.

Цуссалакрал райондалул ОМВД-лул отделданул зузалт оьвчаву дуллаи бур райондалул агьалинайн наркотикру ишакаш булаллисса иширттая чIумуй баян бувара тIий.

Оьвчин бюхьайссар вай телефоннайн: 8 (87) 242 21 403; 8 (929) 999 94 91

ХIадур бувссар Андриана АЬДУЛЛАЕВАЛ

«Жува ца кулпат бушиву ккаккан бунни»

→ Дайдихьу. 1 лаж.

Сапигат Мазаева цалчинмур кьюкьулува бия. АьнтIикIасса чалагьайгу дуртун, аслисса зунтталдушнил миллатрал колорит Кремлилува ябацIанну дия. Ванил чIарав шьябивкIун бия Владимир Путиннул Бувчавурттал штабрал сопредседатель, Театрданул ишккаккултрал союзрал хьунама Владимир Машков, «Защитники Отечества» фондрал регионашал зузисса



Сапигат Мазаева

управлениялул каялувчи Мария Костюк, Москвавулал 52-мур азарханалул хьунама хIакин Марьяна Лысенко, «Коммунаркалул» хьунама хIакин Денис Проценко. Гьаннайсса, шалвагу билаяттран ххуйну кIулсса агьлу.

Владимир Путиннул, бавтIшириннахьу, цахлува чурду буллусса агьалинахьу барчаллагъ тIий, кIицI лавгуна цинявннал аьмсса мурад бушиву билаят хьхьичIунмай буваврил ххуллий-

сса программа. Шиккува кIицI лаганна, 1-мур каналданул эфирданий цусса хаварду бусайсса машгьурсса передачалийгу Путиннул хьирив Сапигатлухьхьун махь буллушиву. «Агьали цивпа гьирарай бувккунни чурду булун, шинчIав бувчIин буллан багьлай бакья чу булун аьркиншиву, кьюкьри дархIуну цивпа най бия. ЖучIа чурду булун яржа бияннин бавцIусса инсантурал ккучунну дия. Агьалинал ккаккан дунни цашиву, жува циняв ца кулпат бушиву», – увкуна ванил.

Патимат РАМАЗАНОВА

Бувчавуртту

Къалакралми районнайсса лакралгу шанма гъантлийсса байран

Шалла дуниял хайран хъунни Аьрасатнал Президент увчлачИсса бувчавурттай чIавусса агъали гьуртту хъанай бушиву исватну чIалай. Совет заманнай кунма, шадну, тяхъану чIурду булун най бия инсантал, гьарца чIири-хъунсса шяраву мыйжаннугусса байран дия. Жу хIарачат бумарду Телеграм-каналданый бувчавурттал тагьар цукунсса дуссарив бусан къалакралми районнайсса лакрал шяраваллаву.

Чарадиял райондалийсса Шаллал шяраваллил хъунама Маммадаев МирзахIажинал (МахIарам) бувсунни, шяравусса яла угъарама инсанная,



АхIмадов АхIмад кулпатрачал Стамбуллай



Бугъарамигу чIурду булун бувккун, Щадун



Шаливсса хъуначув МахIаммадов Давуд чIу булун най

яхъанахIисса Сагъират Ссунгъуровал бусаврийн бувну, Аьрасатнал Президент увчIин кIира участок ккаккан дурну диркIун дур, ца – Абу-Дабилвсса Аьрасатнал посольствалий, цагу – Дубайливсса Генеральный консульствалий. Ванил бувсунни Дубайлив чIурду булун наниминнал бакIрая магърайн диянниннагу къачIалачИсса лахъира-лахъисса къюкъа диркIшиву. Гъан дунни Сагъиратлул яржа бияннин ялугълагъисса агъали-



Мусаев Арсен, Бархъал



Къурбанов МахIаммад, Цуликъян



Участокрайн бучIан къавхъуминначIан шаппай, Щадун



Маммадаев МирзахIажин, Шал

МахIаммадов Давудлуя тIайла хъуну, сайки циняв инсантал чIурду булун бувкшиву. Вайннал участок 1813-мур диркIун дур.

– Билаятрай Президент



Цуликъяннал бувчавурттал комиссиялул аьнтIикIахъул

увчIалачИсса чIумал цучIав тийнайну къаащIайссар, ащIавугу къатIайлассар. Лайкъманахлу чIу булуну, цува цукунсса политикалул тарап дургъуну уссарив, шихлу чIу булун ччай уссарив гьуртту хъун аьркинссар, ва гьарманайн багълагъисса масъалар. Шаливсса агълу чантI увкусса, зат бувчIайсса бур, бувчIавурттаву чара бакъа цалвамур бутIагу бишин ччисса бур, – увкуна МирзахIажинал.

Дахадаевский райондалийсса Щадун тIисса шяравугу, байрандалийн кунма, чIурду

булун бувккун бивкIун бур инсантал, кIичIирттаву марххала лув бивхъуну бухурчагу. КъашавайминначIан, буккан къавхъуминначIан шаппашаппай бивну бур 0371-мур участокрал комиссиялул члентал.

Ахъушиял райондалийсса Цуликъяннал шяраваллил советрал депутатътал Махмалиев Аскирхан ва Арбуханов Басир цалчин чIурду булун бувкминнавух бивкIун бур. Ахъушиял райондалул КИПФ-лул цалчинма секретарь, Дагъусттаннал Жяматийсса палаталул хьи-

ривчувнал кумагчи Къурбанов МахIаммадул бусаврийн бувну, шяраву гражданиннал бурж биттур буван къаччисса инсан къаивкIун ур. Бувчавурттал комиссиялуву бивкIун бур Къурбанова Замира, ванил хъиривмур МахIаммадова Бурлият ва секретарь Исмяилова Зарема. Вайгу, чIурду булун бувкIири пиш тIий хъунабакълай, шаннагу къини шяраваллил агъулданул дакIру шадну личIансса даражалий зий бивкIун бур. Бархъаллал шяраваллил Культуралул къатлул директор Мусаев Арсенулу исват бунни Бархъаравгу байрандалул хIахI бушиву мюрщи-хъуни къакуну, цинявпапу бувкшиву, ялун нанисса никиралгу, билаятралгу бучIантIимунихлу чIурду булун.

КъатIаллил билаятирттайми лакрайну бувкру, интернетрал, социал сетирдал каша ишла дурну. «Илчилул» корреспондентну зий бивкIсса, цIана ОАЭ-лив

нал ккучунну ккаккан дуллалисса видеогу.

Турциянаву, Стамбуллайсса Аьрасатнал Генеральный консульствалийсса участокрайгу вава иш бивкIшиву бувсунни Дагъусттаннал халкъуннал балайчи АхIмад АхIмадовлул.

– Аьрасатнал билаят паччахI-лугърал Конституциялий кулпатрал аьдатрайсса ххазинарду цIакъ бувсса билаят бур, Американал, Европанал Аьрасатнавусса экономика лашинсса даражалий душиврул тIарду пив булларчагу, бувчIайнан бувчIлай бур агъалинал маэшат ххуйсса даражалий бушиву, ттучаннай гьарзат аьркинмур душиву ва агъалигу бучIантIимунийн вихшалдарай бушиву. Жугу, шалва кулпатрал, чIурду буларду Аьрасатнал чаннасса бучIантIимунихлу, – увкуна АхIмадул.

Патимат РАМАЗАНОВА

Аьрасатнал Президентнал буьчІавурттал хІасиллу

	ЧІубуллтрал аьдад	Путин В.В.	Харитонов Н.М.	Даванков В.А.	Слуцкий Л.Э.
Аьрасат	113010839	76277705 (87,28%)	3768470 (4,31%)	3362454 (3,83%)	2795629 (3,20%)
Дагьусттан	1708189	1425408 (92,12%)	79902 (5,15%)	10284 (0,66%)	25681 (1,53%)

**ВЫБОРЫ
ПРЕЗИДЕНТА
РОССИИ**
15-17 МАРТА 2024

**ВМЕСТЕ МЫ СИЛА –
ГОЛОСУЕМ ЗА РОССИЮ!**

ЦИК.РФ

УИК		ЧІубуллтрал аьдад	Путин В.В.	Харитонов Н.М.	Даванков В.А.	Слуцкий Л.Э.
	ЦІуссалакрал район	23450	20768 (95,14%)	615 (2,81%)	95 (0,44%)	303 (2,81%)
1158	Аьхьар (новострой)	398	362 (94,76%)	14 (3,66%)	2 (0,52%)	4 (0,05%)
1159	Чапаево (новострой)	1221	1090 (95,53%)	34 (2,98%)	1 (0,09%)	16 (1,40%)
1160	Банайорт	629	530 (92,66%)	28 (4,90%)	1 (0,17%)	13 (2,27%)
1161	Барчхойтар	612	530 (92,98%)	23 (4,04%)	2 (0,35%)	15 (2,63%)
1162	Гьамиящи	724	650 (94,20%)	23 (5,33%)	2 (0,29%)	15 (2,17%)
1163	ДучІими (новострой)	688	620 (95,38%)	20 (3,08%)	1 (0,15%)	9 (1,38%)
1164	Щуссалак	1080	960 (96,00%)	28 (2,80%)	1 (0,10%)	9 (0,90%)
1165	Щуссаккул (новострой)	1459	1300 (93,53%)	45 (3,24%)	5 (0,36%)	40 (1,43%)
1166	ЩуссачІуртгаци	1676	1509 (93,73%)	50 (3,11%)	13 (0,61%)	27 (2,88%)
1167	ТІюхчар	1076	946 (95,17%)	20 (2,01%)	14 (1,41%)	6 (0,60%)
1168	Гьамиящи (новострой)	705	620 (95,38%)	20 (3,08%)	3 (0,46%)	7 (1,08%)
1169	Щуссалак	2084	1880 (96,41%)	45 (2,31%)	1 (0,05%)	22 (1,13%)
1170	Щуссаккул	845	780 (95,41%)	25 (3,05%)	1 (0,12%)	14 (1,86%)
1171	ЩуссачІуртгаци	812	750 (96,15%)	20 (2,56%)	2 (0,26%)	8 (1,03%)
1172	Новомехельта	1752	1531 (95,03%)	47 (2,92%)	3 (0,19%)	30 (1,86%)
1173	Щуссаккул (новострой)	268	230 (95,83%)	6 (2,50%)	1 (0,46%)	3 (1,25%)
1174	Щуссалак (новострой)	1106	1005 (96,17%)	13 (1,24%)	9 (0,86%)	3 (0,29%)
1175	ТІюхчар	1162	929 (96,74%)	14 (1,42%)	21 (2,12%)	5 (0,51%)
1176	Гьамиящи	996	890 (93,93%)	27 (2,93%)	2 (0,22%)	1 (0,11%)
1177	Чапаево	866	730 (93,59%)	22 (2,82%)	9 (1,15%)	16 (2,82%)
1178	Чаравалу	1033	900 (94,74%)	36 (3,79%)	3 (0,32%)	11 (1,16%)
1179	ТІюхчар (новострой)	1109	995 (95,22%)	30 (2,87%)	4 (0,38%)	16 (1,53%)
1180	ЩуссачІуртгаци (новострой)	604	530 (94,64%)	19 (3,39%)	2 (0,36%)	9 (1,61%)
1181	Шушими (новострой)	414	380 (97,44%)	6 (1,54%)	1 (0,26%)	3 (0,77%)
1182	Ямансу	554	490 (94,23%)	18 (3,46%)	1 (0,19%)	11 (2,12%)

УИК		ЧІубуллтрал аьдад	Путин В.В.	Харитонов Н.М.	Даванков В.А.	Слуцкий Л.Э.
	Лакрал район	7611	6839 (93,50%)	204 (2,79%)	82 (1,12%)	149 (2,04%)
865	Бурши	187	167 (93,30%)	6 (3,35%)	1 (0,56%)	5 (2,79%)
866	Хьюлуссун	211	188(93,07%)	6 (2,97%)	2 (0,99%)	5 (2,48%)
867	ЧІар	332	298 (93,42%)	7 (2,19%)	5 (1,57%)	7 (2,19%)
868	Кьуби	308	278 (93,92%)	8 (2,70%)	3 (1,01%)	6 (2,00%)
869	Кьуби (кьутан)	166	149 (93,71%)	4 (2,52%)	1 (0,63%)	5 (3,14%)
870	КІулуцацІи	149	134 (93,71%)	4 (2,80%)	1 (0,70%)	4 (2,80%)
871	ЧІуртгаци	210	188 (93,35%)	7 (3,48%)	2 (0,99%)	4 (1,99%)
872	КІувур	123	110 (93,22%)	3 (2,54%)	2 (1,68%)	3 (2,54%)
873	Гьумучи	1676	1509 (93,73%)	50 (3,11%)	13 (0,61%)	27 (1,68%)
874	Куми	315	264 (93,73%)	7 (2,31%)	5 (1,65%)	7 (2,31%)
875	Ккурккул	250	226 (93,78%)	7 (2,89%)	3 (1,24%)	5 (2,07%)
876	ЧукІун	114	101 (92,66%)	3 (2,75%)	2 (1,83%)	3 (2,75%)
877	КІундими	589	529 (93,46%)	19 (3,36%)	6, (1,06%)	7 (1,24%)
878	КІундими (кьутан)	72	84 (92,75%)	2 (2,90%)	1 (1,45%)	2 (2,90%)
879	ГьунчІукьатІи	307	277 (93,90)	7 (2,37%)	4 (1,36%)	5 (1,36%)
880	ГьунчІукьатІи (кьутан)	157	141 (94,00%)	3 (2,00%)	2 (1,33%)	4 (2,67%)
881	Караши	150	133 (92,36%)	5 (3,47%)	2 (1,39%)	4 (2,78%)
882	Караши (кьутан)	76	67 (93,06%)	2 (2,78%)	1 (1,39%)	2 (2,78%)
883	Урими	208	187 (93,97%)	4 (2,01%)	2 (1,01%)	4 (2,01%)
884	Ппалассун (кьутан)	163	146 (93,59%)	4 (2,56%)	3 (1,92%)	3 (1,92%)
885	ШавкІул	421	379 (93,58%)	10 (2,47%)	5 (1,23%)	8 (1,98%)
886	Щар	384	345 (93,50%)	9 (2,44%)	5 (1,36%)	8 (2,17%)
887	Хьур	422	380 (93,60%)	10 (2,46%)	4 (0,99%)	9 (2,22%)
888	Хьунайми	213	191(93,36%)	5 (2,45%)	3 (1,47%)	4 (1,96%)
889	Иниши	108	96 (93,20%)	3 (2,92%)	1 (0,97%)	3 (2,91%)
890	Хьурхьи	300	272 (94,21%)	7 (2,42%)	3 (1,04%)	5 (1,73%)

УИК		ЧІубуллтрал аьдад	Путин В.В.	Харитонов Н.М.	Даванков В.А.	Слуцкий Л.Э.
	Ккуллал район	7293	6413 (93,21%)	251 (3,56%)	23 (0,33%)	176 (2,56%)
814	Хьусраши	996	894 (95,51%)	25 (2,67%)	2 (0,21%)	13 (1,39%)
815	Ккул	2623	2420 (96,99%)	40 (1,60%)	7 (0,28%)	23 (0,92%)
816	СунбатІул	264	219 (88,31%)	17 (6,85%)	1 (0,40%)	11 (4,44%)
817	ЩІувкІул -1	273	225 (87,55%)	16 (6,23%)	1 (0,39%)	14 (5,45%)
818	Ваччи	531	481 (97,20%)	8 (1,60%)	2 (0,40%)	1 (0,20%)
819	ЧІяйми	514	441 (91,30%)	22 (4,55%)	1 (0,21%)	17 (3,52%)
820	Хьюйми	182	135 (80,36%)	15 (8,93%)	1 (0,60%)	17 (10,12%)
821	ЦІийши	275	220 (84,94%)	23 (8,86%)	1 (0,39%)	15 (5,79%)
822	Ссухьящи	158	128 (85,91%)	10 (6,71%)	1 (0,67%)	9 (9,04%)
823	Вихьул	682	591 (92,20%)	25 (3,90%)	2 (0,31%)	21 (3,28%)
824	Кьян	158	122 (81,88%)	15 (10,07%)	1 (0,67%)	10 (6,71%)
825	Хьювхьи	210	173 (88,27%)	13 (6,63%)	1 (0,51%)	9 (4,59%)
826	ЩІушар	151	122 (85,92%)	11 (7,75%)	1 (0,70%)	8 (5,63%)
827	ЩІувкІул -2	278	237 (92,22%)	11 (4,28%)	1 (0,39%)	8 (3,11%)



ИТНИ, 25 МАРТ
05.00 «Доброе утро».
09.00 Новости.
09.20 «АнтиФейк». (16+).

22.55 «Большая игра». (16+).
23.55 Александр Проханов. Ис-
поведь. (18+).

21.00 «Время».
22.00 Т/с «Такси под прикрытием».
(16+).

21.00 «Время».
22.00 Т/с «Такси под прикрытием».
(16+).

21.00 «Время».
22.00 Т/с «Такси под прикрытием».
(16+).

21.00 «Время».
21.45 Голос. Новый+.
23.30 Матадор. (16+).

23.00 Х/ф «Не хороните меня без
Ивана». (16+).

РОССИЯ 1

ИТНИ, 25 МАРТ
05.00 «Утро России».
07.35-07.41 Местное время. Вести-
Дагестан

03.45 Детективный телесериал
«Морозова». [16+]
ТТАЛАТ, 26 МАРТ
05.00 «Утро России».

03.45 Детективный телесериал
«Морозова». [16+]
АРВАХИ, 27 МАРТ
05.00 «Утро России».

03.45 Детективный телесериал
«Морозова». [16+]
ХАМИС, 28 МАРТ
05.00 «Утро России».

03.45 Детективный телесериал
«Морозова». [16+]
НЮЖМАР, 29 МАРТ
05.00 «Утро России».

XXУДЛУН, 30 МАРТ
05.00 «Утро России. Суббота».

АЛХИАТ, 31 МАРТ
06.10 Любовь Баханкова, Марина
Могилевская, Кирилл Плетнев

ДАГЕСТАН

ИТНИ, 25 МАРТ
07.00 Время новостей Дагестана.
08.00 М/ф «Смешарики. Пин-
код» 0+

05.10 Х/ф «Здравствуйте, я Ваша
тетя». 16+

04.15 Передача на лакском языке
«Арыши ва аьлу». 12+

05.10 «Первая студия». 12+
03.05 «Молодежный драйфт». 12+

02.40 «Первая студия». 12+
03.05 «Молодежный драйфт». 12+

01.15 Передача на кумыкском языке
«Халк ва заман». 12+

«Вахтар ва инсанар» 12+
01.50 Д/ч «Сестль в Стране чудес»

НТВ

ИТНИ, 25 МАРТ
04.55 Т/с «Пасечник». (16+).

01.55 Т/с «Дознатель». (16+).

АРВАХИ, 27 МАРТ
04.55 Т/с «Пасечник». (16+).

06.30 «Утро. Самое лучшее».
(16+).

06.30 «Утро. Самое лучшее».
(16+).

08.20 «Поедем, поедим!» (16+).

АЛХИАТ, 31 МАРТ
04.45 Х/ф «Близнецы». (12+).

«Илчилул» календарь

Ва нюжмардий бувссар:

Март зурул 19-ний 1936 шинал увссар Дагъусттаннал халкъуннал художник **Хайруллагъ Къурбанов**.

Март зурул 19-ний 1949 шинал увссар жяматийсса ва политикийсса ишккакку **Аблихан Аблиханов**.

Март зурул 21-ний 1935 шинал увссар химиялул элмурдал доктор, профессор **Оьмар Тгаттаев**.

Март зурул 22-ний 1951 шинал увссар Совет Союзрал Виричув, космонавт **Муса Маннаров**.

Март зурул 22-ний 1928 шинал увссар халкъуннал просвещениялул отличник, муаблим-методист **Нуратгин Маммаев**.

Март зурул 22-ний 1936 шинал увссар философ, публицист, жяматийсса ишккакку **Киров Султанов**.

Март зурул 24-ний 1951 шинал увссар архитектор **Къурбанмахаммад Керимов**

Бусравминная

Ххаллилсса шяравучув дакІнийн утлай



Жула учайссар: «Адаминал цала миналун къаттагу буну, оьрчІругу хъуни буну, дуккингу буну, яла дуньялулгу буну – ва ххаллилсса кулпатрал заллу ур, цанмагу, оьрчІангу лайкьсса оьрму шаллу бунни», – куну.

Укун исватну цала чувшиврул бигаргу лавхъун, мунир ххюлийну ххишаласса хъиншивурттугу дурсар цала мачча-гъаннангу, жяматрангу, дустурангу **Чуртташатусса Магъдиев Аблил Магъдиевичул**.

Вай гъантрай Аблил ниттил увну **100 шин хъанай дур**.

Увссар Аблил 1924 шинал мартрал 12-ний. Гъумук 7 классгу къуртал буну, дуклан увссар Буйнакскаллал финансиртгал техникумравун, ва къуртал байхту зун ивкІссар Гъумук бухгалтерну.

Кулпатрацал Хасаврайн ивзун махъ, шагьрулул Межрайбазалий цала пишалий зий уссия. Зий унува дуклан увссар Москвауллал Финансиртгал академиялувун, къуртал бувссар ЯтІул дипломрай.

Хъинну зат кІулсса, итххяхвсса специалист хІсаврай Аблил зун тІалав увссар Дагпотребсоюзрал хъунама бухгалтерну.

Цала оьрмулул хъунмур бутІа Аблиллул бувссар Дагпотребсоюзрай зий, яла, пенсиялийн увккукун, зун ивкІссар Промышленностьрал министерствалий ревизиярттал управлениялул хъунаману.

Ххуйсса давурттай зий унугу,

Аблил МАГЪДИЕВ

Аблил уссия дакІ хъун дакъасса, ас-намус бусса, хъунанал хІурмат бусса, чІивинал урват бусса ххаллилсса зунттал чув.

Аблил кІулнал ваяна ххуймур, хъинмур бакъа къаучинтІиссар. Ванал биялсса кумаг бувссар цала даврихчІийнгу, кІулшивурттайнугу, шяравасса дуккавриву итххяхвсса жагьилтал дуклан бухлахийнугу, давурттайн къамул буллалийнугу, цанма кІулсса хІакинтурайхчІин къашайнал-шайнал чІаравгу авцІуссар.

Аблиллул бусса хъинбалартту шинчІав хъамакъабивтссар, сагъний хъинну бусраврай, хІурматрай уссия шяраваллилгу, шагьрурдайссагу жяматрал дянив, ахиратрал хъуну махъ хъинчулий дакІнийн утайссар цинявннал.

Хъиншивруцал архІал Аблил уссия яхІлувгу. ЧІярussa дардру дурхІуссар, амма цала дакІнил къумашиву кІул къадайва, гъарцагу жяматрал иширттаву хІаласса ия.

Аблиллул буссия ххюва оьрчІ. Ми циняв, лавайсса даражалул кІулшивурттугу ларсун, зий буссия ххуйсса давурттай. Арс Жамалуттин – медициналул элмурдал доктор (аьпа бивухъул, Аблиллул шамагу арс жагьилну бунува ахиратрал хъуссар), душ Саидат – медициналул элмурдал кандидат, Светланагу цила пишалий зий бур.

Магъдихъал Аблил

ЧІУРТТАЩИЯЛ ШЯРАВАЛЛИЛ ТАРИХРАВА

Магъдихъал Аблил



ЧІурттащиял лачІунбуккулт

Аблиллушал гъанну кІул хъуссара на «Илчи» кказитрай зузисса шиннардий, ва ия «Илчилул» хъхъичІунсса дус, гъарца шинал кказитту чичайва, ванал чирчусса чІярussa макъалартту ва шерирду буккайссия гъарца номерданий тІиссакссагу.

Ванал аькьлу-кІулшилий, гъалгъалулнахІушиврий, пасихІшиврий хІайранну бикІайва кказитрал зузалт. Аблиллул хІурмат ттучІава хъинну лавайссия, мунир лайкьссагу ия.

Аблил Магъдиевичул итабавкъуссар лакку мазрайсса 2 жуж: «ЧІурттащиял лачІунбуккулт», «ЧІурттащиял шяраваллил тарих». Вай луттирдайну акъассагу, цала дурсса ххуйсса давурттайнугу Аблил мудангу дакІний личІантІиссар цала унангу, шарнил жяматрангу.

ИвкІуссар Аблил Магъдиал арс 2013 шинал июль зурул 27-ний.

Аблиллул бувтссар хъинну бусравсса, дакІ къумасса оьрму. Алжаннул ххари аннав, хІатІ гъартасса хъуннав.

АьтІикат ХАСМАХІАММАДОВА

Барча бавуртту

Вил цІа мудан дуссар жул дуаьлувух

Яла захІматмур дяввилул чІумал цІуну сакин дурсса Шуссалакрал райондалул цалчинма секретарьну ивтун ивкІссар ганинин Лакрал райондалул хъунамашиву дуллай ивкІсса **Цаххаев ОьмарІажи Цаххаевич**. Ванал хъунмасса захІмат бивхъуссар райондалул сакиншиндарал цІурувкъуми, жапами мурадру шаллу буллай. Та ппурттуву шикку къадиркІссар хІукуматрал парагу организация. Жу, цІуссалак, ванайн бутта учирчагу, къабяйкъинтІиссару. Мартрал 14-ний ОьмарІажи Цаххаев увну хъуссар 110



шин. Вил бунагьирттал аьпа баннав. Ина жун тачІавгу хъамакъаитантІиссара!

Ина, Шуссалакрал бакІ дурьгу чІумал, Бутташиву дурссар оьну ливчІминнан. Ялгъузну ливчІминнай аякъа дурссар, ДакІнийгу уссара ина жун мудан.

Ина бувксса «ххуллу» жу бурувчуссар, Зия хъун къабивтссар вил аькьил махъру. Район цІу ларгсса чІун хІайп вин къаккарксса, ХІайп вин ххал къархъусса хъун шяравалу.

Уцин ччивав ина неххал зуманийн, Къуллугъчитал бавтІун, вихъхъун махъ булун. Яла, лагма лавгун, къавтІун изан ан, Цалла райондалийх машалли уван.

Жу вин дуллуссари «Геройнал» цІагу, Виричувнал данмур дурну тІий ина, Жул махъру чІалнугу, багъишла бити, Вил цІа даин дуссар жул дуаьлувух.

Зайнулла МИРЗОЕВ, ш. ТтурчІи

Баян

РедакциялуцІун дархІусса тІалавшиннардайн буну, «Илчилул» бишлашисса жижарарттал текстру буссар укунсса багърал лагрулий: укунмасса жижара – 400 къ., суратрацалсса некролог – 500 къ.

«ИЛЧИЛУЛ» редакция

Уттигу ца цІусса рейс

МахІачкъалаллал аэропортрай май зурул 5-ний байбишин тІий бур Мордовиянавунсса рейсру тІитІлай. Дагъусттанна Саранскалийнсса самолетру лехлан тІий дур алХаткъинирдай, махъуннайсса рейсру дур ссят 11:40 минутІраву, аьмсса ххуллул манзил бур 2 ссят ва 20 минутІрайсса.

Рейсру дуллан тІий бур «Мордовия Авиа» компаниялул самолетирттай. Билетирттал багъа цалсса кІулну бакъар, личІину ххирану къабикІантІиссар тІий бур.

ЦІуну тІитІлатІисса авиа-рейсру, кІирагу региондалул

агъалинан дакъассагу, бизнесментуран ва туристтуран къулайшиву дусса дикІан тІий дур.

Зурул мутталийсса хІасиллу

МахІачкъалаллал аэропортрай дунни зурул мутталийсса даврил хІасиллу. Февральданий аэропортрай къамул увну ур 158 848 пассажир, ларгсса шинал вара чІумушал цачІу бивхъуну 8,3% ххишаласса.

Му бакъассагу, февраль зуруй аэропортрай ва аэропортрайн дурну дур 1160 рейс. Къамул дурну дур ва тІайла дурккун дур 284 тонна къайлул

ва почталул, вайгу 2023 шинаяр 32,8% ххишаласса хъуну дур.

Аэропортрай яла тІалавми рейсру дур Москвалийн, Санкт-Петербурглив, Сургутлив, Къазаннайн ва Минводьлийн. Дазул къатІувсса билаятирттайнсса рейсирдава яла тІалавми дур Стамбуллайн, Дубайлив, Бакуйн, Джиддалийн ва Шарджавлийн.

2024 шинал яла гъарзану пассажирттал ххилаххисса авиакомпанияртту дур «Победа», «Аэрофлот», «Ред Вингс», «Сибирь» ва «Уральские авиалинии».

Аэропортрай тІитІлайнма бур цІу-цІусса рейсру. ХІакъинусса къини МахІачкъалаллал аэропорт ккаллину бур СКФО-рай яла чІявусса пассажиртал къамул буллалиссанун.

Имара САИДОВА



Интнил хъхъу барча дуллай

Ххирасса оьрчIрув! Интнил хъхъу на оьрчIсса заманнай ца яла сийлиймур байран дикIайссия. Интнил тIабиаьт цу дуккаву, хъхъу ва кьини архIал дацIаву хъуннасса шадлугърай хъунадакьин хIадур хъанай бикIайссия мюрши-хъуни къакуну.

Интнил байран цурдагу мартрал 20-нния тIайла хъуну, 3 кьини дайссия. КутIану байрандалул аьдатирттая бусан, ниттихъал цала оьрчIан ва кьининин бартри дайссар. Бартри – гьивхъ, ккункуру, кишмитIутIи къувтIуну бувсса ччатIри. ЧчатIру шахъайсар гьаттарал, дучрал бакIурдил журалийсса куцру бувну. Интнил хъхъу дучIаннин оьрчIал тIуршив дайссар. Ми, къяртив, бюрув, ширпив батIлай, хIадур хъанан бикIайссар. Интнил хъхъуну лахъсса кIантурдай, бакIурдай,



ккурчIав къавтIив бичайссар. Яла оьрчIру, жагьилтал ва бугъарами гайннул ялтту тIанкIа тIун бикIайссар:

*Ттул цуцIаву цIарахъхъун,
Цуллушиву чурххъхъун!
Ттул цахханну – вивун,
Вил тирхханну – ттувун!*

КкурчIав занбарагру битлай, тяхъашивуртту дуллан бикIайссар. Лахъсса кIанттайнгу лавхъун, тIуршив ритлан бикIай-

ссар. Шарда личIи-личIисса дукрарду дайссар. Гайннуйн «къатта тату» чайссар.

Цахъхъунна бартри дуллувкун, оьрчIру, гайгу ларсун, къатIув бувккун, укун тIун бикIайссар:

*Ва барта мяи, мяи,
Цу барта мяи, мяи,
Барта урцIи мяи, мяи!
Ссав кIучIин, мусил кIурчIлу мяи,
Шялу диххан, арцул кказа мяи,
УрчIва цIуку – Шахъарав,
Шиннарал гьи – Бархъарав!*

Жулзаманнай 3 зурулхъхъичIва байбишайва оьрчIру тIартIсса усру, тIаннул парчри батIлай, къувтIилувун бичин. ХIатта, бавахъал бярабакIурдайнума шайссияв. Машинардал духсса нигъру цу шуну зунтул бакIуя ккуру ритавуя шадлугърал ца яла ягинмур бутIа. Цумур махIалул къавтIи хъунмасса бурив бьастчалгу бикIайссия.

БивкIун бур, къабивкIун бур цулкIул оьрчI. Ганнин цукунчIав къабувчIлай бивкIун бур цуппа циван чантI увкусарив. Цупарданул къув-аьслиллив, Тилли шяравасса тIамакъукултIрал ххарачIанттул чIуниллив ягу ччяни бизайсса лелуххул гъялуллив... Агар ганил цухълувун битИкъукулт бувххун бухъурча? Ва пикри багъайхту, нигъавххуну, цулкIул оьрчI цухълува буккан анавар бувккуна. Иширах бургарча, битИкъукултран дакIнийвагу бакъая цулкIулчIан «хъамалу бучIан»: гай паракъатну вацIул ратIнил зуманив аьрщараву ххилтIу тIий бия. Чаннайн буккайхту, бувчIуна цулкIул оьрчIангу, иш ссаву буссарив. Циван къабикIави, кIиришиврул авлия бувсса оьрватIив бивкIун бия бярав аьлагъужасса концерт дуллай. Кувний миннул август зуруй мукунсса аьлагъужа гъаз байвахха, цулкIулцIун цушагума нигъабусан бан кунмасса. ЦулкIун вацIул къартIалтрал паччахIлугърай низам дишинна тIисса пикри багъуна, амма, гавачIана пикригу баххана бувну, уттигъанну пурсеукърал къариртсса цухълуца чулий багъуна. Ва ганил оьрмулувусса кIилчинсса гьи дия. Гъавалуву паракъатшиву дия, цичIар сукку къатIисса пахъдагъру дия. ВацIул мурхьирдал чIапIаву пахъ багъну бия

ЦулкIул оьрчI



ЦулкIул оьрчI

марчгу, шанан бивкIхъунссия. Так мичIакIращаву бучIан къахъунсса, куртIсса къакъалул ччаннашI, чарттайн пар бутлай, экъи най дия хъун дакъасса ратI. ВацIул къирагърай тIутIайх дирчуну дия банавшатIутIив ва някIултIутIив, цан-хъахъисса чаннал пар багълай бия гъарилтIутIая. Анжагъ, узулликкурттал мусил къатIраву, ца тIутIуя ца-

муний ликлай, уттигъанну дурсса гъарал кIунтIру цIупIа тIий, хъинну агъамсса даву дуллалисса журалий къуццу тIий бия шуттарисса гъагъанайрду. Щавшилул шюллисса рахIулул къартравух аьрщарайн бургъил тIинттал зума зизайхту, цулкIул оьрчIал рахIулул бухчIинссаннуйсса ппал арцул махмурданул рангирай пар тIун дикIайва. ЦулкIун ххуйну кIула вацIул къанкъру, цулкIул вичIив Тельбулаграл вацIул яла личIулуми вичIив духъунссия. Ганин, хIатта цухълува букъавккувагу, дакIних кIула цинявппа чIурдал мянарду. Тана, пялутрал ухнилусса «лаякъаттагу» къабивтун, дири-ну бувккун нанисса щацIулу, тана, цийнува цуппа, къартI куну, гъавгъунни бугъарасса мурхъ. Тана бюрхтуккугу бувкун.

ЦулчIа яхъанахъисса вацIа, бугъара хъусса, биялсса мурхъру къатI хъусса бия. Тасса-тарив, бьякъусса зунттава буккайссия кIи рутан цухъри, ккашил кьия дирсса циникъру, чIу къахъунну шаттирдугу ласлай, ратIнил чIарав хIаллил лелуххантрайн авлий буклан бикIайссия. Щиллив вацIулвун бувцуну увкIсса, ххирасса мех

бусса енотру ратIницIун ила бичайхту, бакъа-къатIа хъуну лавгессия вацIлува лелуххант. Вайннул тти кюртти бувайва лахъну, мурхъру цунний ва гъунзний. Ниттил лахъхъин бувсса куцшуй, цулкIул оьрчI вацIлувух сайрданий буклакийни, цилва шаттирду бьякъин буллан бикIайва, цуцIав хъирир къаагъаншиврул. ЦIанакулгу ганил шуншумагIигу лавай гъаз бувну, ссунтI увкуна, гъавалуву ссал къанкъ дуссарив лаласуншиврул. Цурир, кIукIуну шаттирдугу ласлай, най унуккар вацIул ххуллийх. Авчи урвав? Ягу «Хазар» турбазалиясса ттукулнисру датIулт? Ягу цу-унугу ТельбулаграчIансса ххуллук луглай урвав? Ци-бухъурчагу, бакI ххассал буван, цулкIул оьрчI мюршисса лелуххант гъавалувун гъаз хъанахъисса азгилданул къатIраву лабивкIуна. Яла, паракъат шайхту, цIуница ххуллийн бувккуна. Га гъан хъуна гъалххасса къяртри ратIнил шинаву вилаглагисса кIялагьилучIан. Ккашил хъусса цулкIун тикку балугъру бугълан ччан бивкIуна. Ссаннугу мяххи урттул «чIирттараву» кIучI дурну, лабивкIуна. Амма чавахъру бириллай бакъая. Чавахъирт-

тал ахттайнссаннуйн тамахI къукъайхту, оьрватIайну дагъия дуван пикри бувна. ОьрватIив бугъан захIмат бакъая, гассят ца къацIилвун лавсуна къуршцу бувансса пикрилий. Амма, къацIилвун бирияйхтува, оьрватIул чутту багъсса бурчу цухлил къункъал лавсун нанисса кIяласса хъомушиврул бувцIуна, цулкIулугу оьрватIи махъунмай пурх куна. Пайда бакъахъувкун, ккаши ххен буван къюнукулул къяртавун ушу-шулгъилийн шунна тIисса хIалатраву, къаккакканнав чавахърал ссирсилттал магъ! Мугълат бакъа щинавун ххявххуна цулчIа, ури рахIулия арцул пар бусса щинал жангригу зурзу буллай, кIутIу-кIусу тIий, бувккуна къацIливу тия-шия бишлай шурушисса балугъгу бувгъуну. МаркIачIанмай, цакуну чарив, хъхъирил чулдания бувксса мурчал гъалакIу дурсса ттурулал пардаврал кIучI дуллан диркIуна някIултIутIал рангирайсса ссавнил лахIуни. Къув-аьс тIун диркIуна. Ччурччусса урттуйх дачIу риршуна гъаралуннил, къабагъуна ушу-шулги, бяравсса оьрватIал къяр-къяргу бяливчIуна. Ва чIумалнин жулва цулчIамур пюнх буллуно шанай бия пурсеукърал цухълуву.

Файк ЗАКИЕВ,
Азирбижаннал лайкъ хъусса журналист, 1996 шин Сурат авторнал «ЧимучIали» хIадур бувссар Патимат РАМАЗАНОВАЛ

Театр

«Интнил хъхъунил» асарду

Чъявусса илгу тамашалийн бивкун, хъуннасса сийлий шай гъарцагу шинал Лакрал театрдуанул Интнил хъхъунин хас дурсса концерт, хъинну яргесса, авадансса диклай мунил программа: аьдтрацун бавхусса балайрду, аслийсса халкъуннал балайрду, туркюрду, къавтIавуртту.



2015 шинал «Интнил хъхъунил» проект лайкъ хъуссар Аьрасатнал Театрал ишккакултрал союзрал сакин бувсса «Грани театра масс» тIисса шалагу Аьрасатнал конкурсрал дипломран «Лучший национальный праздник» номинациялий.

Дунияллий хъанахъимуниясса хавардая шацI шаврил, чаннасса ва ххарисса асардах мякъ бувксса тамашачитуран дакIинисса малхIанну хъунни ва базилухъсса Интнил хъхъунил байрангу.

Циван ххирар агъалинан Лакрал театрдуанул программардаву яличIину Интнил хъхъу чирча, му так хъярч-махсарардал, туркюрдал, балайрдал ва къавтIавурттал авадансса душивруцун, агъалинан дакIинийн дутай хъамадитала хъанахъисса аьдатру, европанал ва аьрабнал модалу ялун бигъаврил жула оьрмулува дукан дурну ларгесса миллатрал лаххия. Исвагину даркъуну дия жула артистгъурай чиллучухъри, бузмарду, чалагъайртту ва хара-лачакру, миннул янна лархминнал журат ххуй дуллай, цу-цанпир ххи буллай бия.

Лакрал театрдуанул проектирдай гъуртту хъун гъирарай бучIай цIанихъсса балайчиталгу, сахIналийн дахъва буклакисса

балайчиталгу. Интнил хъхъунил программалуд мударнасса хъамалли тамашачитурангу ххирасса Бархъаратусса Тазарият Сулайманова, Загъидат Муслимова, Жанна Къурбанова. Гъуртту хъунни лакрал шаннагу райондалиясса магъирлуьгърал устартал, ххалилсса чIурдал ва такъвардал залухъру: РайхIанат ХIажиева – Ккуллал райондалия, Шамсият Какваева – Лакрал райондалия, Аслан Муслимов – Цуссалакрал райондалия. Яруссаннал цIанихъсса балайчи Аьбулла МахIаммадмирзаев, Дагъусттаннал магъирлуьгърал колледжрал къавтIалт.

Программалий гъурттуну бия театрдуанул сайки цинявпа артистгъал ва балетрал труппа. Миннацун, сахIналийн бивккун, миллатрал лаххиялува балайрдахун къавтIий, концертрал сий хъун дан пашава бюхъайсса ксса хIарачат буллай бия артистгъурал оьрчIругу. Вайнна Ислам ва Рукъижат МахIаммадовхъал, МахIаммад Амировлул аьнтIикIахъул. Ца даркъуну дияча цайрагу миллатрал лаххия. Ибрагъим Рабадановлул шанна шинавусса арс Хучбаргу чиллучухълува сахIна чIолу буллай ия.

Личи бавияв язими номерду:

МахIаммад Амировлул лакрал миллатрахасса балай, цувагу Дагъусттаннал магъирлуьгърал оьрмулува хъуннасса хъар дургуну бивкIсса Киров ва Гулизар Султановхъал, цал аьпа баннав, душнил Светлана арсри. Кировлуха лавхъхъуну авадансса чIу ва такъва.

Зунттал ратIал марцI шинал жоржулуха лавхъхъуну экиннисса бия Зульфия Архилаевал балай. Ялун буккансса балайчитал хъунсар Изумруд МахIаллиева ва Аида Садыкьова.

Шамсуттин Къаплановлул, Аьбул Мурадовлул, Ямлихан ХIажиевлул, Ибрагъим Рабадановлул увкусса лакрал халкъуннал балай «Чаргудай». Концертрал яла яргмур номерну кIицI бавияв театрдуанул балетрал къавтIалтрал шаллу дурсса аслисса лакку къавтIаву «Къирият», къуманал дакIру аьч дуллалисса, гъавас бутлатисса. Постановщик Аьрасатнал лайкъ хъусса артист Муса Оздоев. Дайдирхъуна концерт Арслан

Шагъмардановлул «Интнихъсса» балайлул хорданий. Къуртал тIурча, дуруна Лакку билаятрал гимну хъусса МухIуттин Чариновлул Лакку билаятрахасса балайлийну.

Муданна кунна устарту концерт дачин дурну бия Дагъусттаннал халкъуннал артистгъал Шамсуттин Къапланов ва Саният Рамазанова.

Сайки шанна сьятрайсса концерт дайдирхъуну къуртал хъунца балайчитурахун руцлай бия цIанихъсса музыкантгъал: Арслан Шагъмарданов, ХIусайна ХIусайнаев (зюннав). ХIадур дурну дия концерт Аьрасатнал лайкъ хъусса артист Аслан МахIаммадовлул ва Арслан Шагъмардановлул.

Ва базилухъ Интнил хъхъунил байрандалийн хаварбакъулий багъну, хъинну хIайранну ливчIун бия Ярославль шагърулиясса туристкахъул. Даршу къинигу дуну, чун гъан хъинавав тIий пикрирдай бунува, театрдуанун инсантал нанисса кавккун, гъира багъну, бивкIру тIива. БайкъалитIавай буслай бия цала асардая. Ххуй дирзун дия лакрал миллатрал колорит, аслишиву, балайрду, къавтIавуртту.

Зулайхат ТАХАКЪАЕВА

Дагъусттаннал университетрал спортрал комплексраву хъунни профессортал И.И. МахIаммадсултановлул ва Д.К. Джаваговлул аьпалун хас дурсса «Кубок ректора» цIанилусса тIуплий буккавил турнир.

Турнирданул диплом лайкъ бунни



Ангелина Аьлиева

Бяст-ччал хъунни Дагъусттаннал университетрал зузалтрал дянив. Хъаннил командалува «Яла цIакъмур связующий» тIисса диплом лавсунни Дагъусттаннал университетрал библиотекалул зузала, Ккуркуллал шяравасса Аьлиева Ангелина ХIусайннул душнил.

Ангелина школалий дуклакийна спортрал чулуха итхъавхъсса душ бивкIава. Райондалул спортрал бяст-ччаллаву гъуртту хъуну, мудар хъхъичIунсса КIанттурду бугъайссия.

1995-ку шинал Ккуркуллал дянивмур даражалул школагу къуртал бувну, Ангелина бувххун бур Дагъусттаннал университетрал филологиялул факультетрайн. Студентсса шиннардийгу гъуртту шайсса бивкIун бур ва университетрал спортрал бяст-ччаллаву. 2000-ку шинала шихунмай зий бур университетрал библиотекалуву. Ангелинал бусласимунийн бувну, университетрал гъарица факультетрай дур цала-цала хъаннил ва арамтурал волейболданул командартту.

Гъарица ххуллункьини вай лагай тIуплий бивккун бигъалаган. Командарттал дянивсса бяст-ччал университетраву аьдатравун багъну бур. Царагу турнир къашай Ангелинал бахшиш лайкъ къадурсса. Спортрал бюхъу ванин цила ниттил ниттия, чIярусса шиннардий Ккуркуллал школалий зий бивкIсса Гуржагъан Аьлиевная бивсса бухъунсар. Вагу жагъилний спортрал чулуха итхъавхъсса бивкIун бур. Ххуйну тIуплийгу буккайсса бивкIун бур

ХъхъичIунсса КIанттурду бувгъунни

Вай гъантрай МахIачкъалалив хъунни дуклаки оьрчIал дянив-Всса Грэпплинграл республикалул турнир.

Шикку гъуртту хъуна Гъазигъумучиял школалул дуклаки оьрчIру. Тренер МухIаммад Майрановлул хIадур буллалисса Universal Fighters Dazicumuh клубравасса 4-мур классрал дуклаки оьрчI Нуручиев Исламлул, 10-мур классрал дуклаки оьрчIру

Буйнакскаллал педучилишалува дуклакисса шиннардий хъинну лечайсса буну, «Лечу» тIисса ялуцIагума диркIун дур. Спортрал чулухасса гъунар бусса бия Ангелинал ниттиуссурвалгу.

– Ккуркуллал школалий дуклакисса шинну ттул оьрмулува яла чаннами, тIааьнми асардацун дархIусса дия. ХIурматрай ва барчаллагърай дакIинийн бичара ттухъра дарсру дирхъусса цинявпагу учительтал, хаснува спортрах гъира бувтсса физкультуралул учитель Пятали МахIаммадович. Цала дарсирал бюхъу бусса буну тIий ванан на ххирасса бивкIава. Жугу бувцуну, мудар учIайссия Гъумукун райондалул спортрал бяст-ччаллаву гъуртту хъун. Ялув авцIуну икIайссия бяст-ччаллал хIасиллу дуллалиний, журилул тIайлану къимат бишуншиврул. Транспорт къадикIава, чIярумур чIумал соровнованияртту къуртал хъуну махъ Гъумуча Ккуркливн бахъта бучIайссияв.

Школалул директор Даниял Магъдиевлул, учительтал, дуклаки оьрчIру, нину-ппу бавтIун, шадлуьгърал даражаллий барча байвав, лахъа-хъун байвав. Нава хъунма бусса, тарбия дуллалисса бава-тIаттагу сагъсса, ххарисса лахIзарду бусса тай шинну ттун тачIав дакIиния къадуккансар, – тIий бур Ангелина.

Спорт ххирасса Ангелинан университетраву тIайлабацIу хъуну бур. Ректор Муртузааьли Хулатаевич спортрал даврих хъуннасса къулагъас дуллалисса, студентгъуралгу, зузалтралгу дянив спорт машгъур дуллалисса инсан ур.

– Укунсса спортрал бяст-ччаллал жу хъиннува цанначIан ца гъан бувару, зузалтрал дянив нахIу-хIалимсса араду хIасул шай. Залданувун бивкIсса чIумал жу бигъалагару телефонная, тIааьн бакъасса хавардая. Му чIун дикIай ссаякIуй цамур затрая пикри къабуллалисса, – тIий бур Ангелина ва барчаллагърай бур спортрал даврихсса къулагъас чан хъун къаритлатисса Муртузааьли Хулатаевичлул.

Дипломгу барча буллай, чIа тIий буру Ангелинан оьрмулува, давриву, спортраву так хъхъичIуннайшивуртту.

Андреана АьДУЛЛАЕВА

Къадиров ХIажи-АхIмадлул ва Гадаев Мурадлул бувгъуна хъхъичIунсса КIанттурду.

Спортсментал ва тренер барча буллай, чIа тIий буру ттиния тихуннайгу чIярусса ххувшавуртту.

Андреана АьДУЛЛАЕВА

Бусравминная

Авурсса къатрайну абад дунни цалла цла

СунбатИуллал шяравасса Стънар бусса архитектор ХАжикъурбан ХАжикъурбанов кIулминнал учай: «Ванал сагъну унува тIивтIуссар панма алжаннувунсса ххуллу», – куну. Цукунни учирча, Дагъусттаннайсса ацIунния ливчусса мизитирттал проектру дурссар ХАжикъурбаннул цурда ца кIапIикI царагу даврихгу къаларсун. Мизитру бакъассагу, чIярур Дагъусттаннайгу, цайми регионайгу ванал проектирдай дурсса авурсса къатри.

Увну ур ХАжикъурбан 1952 шинал СунбатИуллал шяраву, Илларкъадинал ва Изал кулпатраву. Ванал ппу Буттал кIанттул цанийсса Хъунмасса дяввилул участник ур. Немецнал фашистгьтал ххит буну, Ххувшаву ларсун махъгу, ванал дяввилул ххуллу къуртал къавхуну бур. Японнашалсса дяввилуигу ивкIун, так 1946-ку шинал зана хъуну ур чIярусса наградартташал. Миннувух дур ЯтIул Цукул орденгу. БакI-чурх бусса, чай буртти икIан, тур ришун кIулсса зирангсса аламина ивкIун ур.

ХАжикъурбан мукъва оьрчI бусса кулпатраву чIана-чIивима ивкIун ур. Школалий дуклакинийва ва сурат дишаврил гънар бусса ивкIун ур. Му хIисав хъусса ванал учитель ва чIаххувчув, цувагу искусствалуву зат бувчIайсса, Михаил Амуттиновул мудан чайсса бивкIун бур, ява сурат дишаву къамаритара куну. ХАжикъурбан 9-мур классраву дуклакисса чIумал Михаил Амучиевичул бахшиш буну бур ванан «Основы изобразительной грамоты» тIисса лу.

– Махъ, яла, ттун му луттирал автор, профессор Г.М. Белошал хъунаакъинсса бахтти хъуссар, – тIий ур ХАжикъурбан.

Школалий дуклакисса чIумалла ванал, цува куна сурат дишаврил гънар бусса Тарзан тIисса одноклассникнашал, Буттал кIанттул цанийсса Хъунмасса дяввилуи жанну дуллуминнансса обелиск дурну дур шяраву.

СунбатIлив 8 классгу бувккуну, ХАжикъурбан увкIун ур дуклан Ваччийл школалийн.



ХАжикъурбан ХАжикъурбанов



Лакрал театрданунсса къатрал проект (цIанасса Къумукьнал театрданул къатри)



«Лезгинка» ансамбльданул центр

Ва дуклакисса класс хъуну бур Ваччийл школалул цалчинмур выпуск. Школа къуртал буну махъ Венгриянаву аьралий къуллугъу лавхъун, увххун ур дуклан

Къарачай-Чаргаснал педагогикалул институтрал художественно-графический факультетрайн. Мивун уххан ванан маслихат буну бур армиялий ца экипаж-

раву къуллугъ буллаи ивкIсса ва институтрал преподавательнал. Таний МахIачкъалалал вузраву мукунсса факультет къабивкIун бур. Къарачай-Чаргаснал пе-

дагогикалул институтравури художественно-графический факультет тIивтIуну бивкIун бур нукIува кIицI лавгсса Бедол сиптIалий. Ва факультетрал выпускниктал хъуссар Дагъусттаннал пединститутрал худграфрал цалчинсса преподавательталгу. Цаппара шиннава ХАжикъурбан увххун ур Ленинградулал инженерно-строительный институтрал архитектурный факультетрайн, ххуйсса кыматирттай экзаменугу дуллуну. Къуртал буну бур лайкьну дипломгу бурувчуну. Шивун ухханнин ХАжикъурбан зий ивкIун ур Ростов-на-Дону шагърулий Ростсельмаш заводрай художник-оформительну. Ва ппурттуву живописьрахун агъну, гьуртту хъуну ур Къиблалул федерал округрал самодеятельный художниктурал выставкардай, лавсун бур дипломгу. ХАжикъурбаннул захIматрал ххуллу байбивхъуну бур 1985-ку шинал Дагестангражданпроект институтрава. Укунасса архитектурная айивхъуну, хъунама архитектурнал къуллугърайн иянин, ацIра шинаи зий ивкIун ур шикку. 1995-ку шинал зун ивкIун ур хъунама архитектурну «Махачкалагорпроект» институтраву. Мунир махъ, ца-кIира шинайсса архитектор О. Оьмаровлул творчествовалул мастерскойлуву зийгу ивкIун, увкIун

премия. Театрданул интерьергу жура яхъан дурсса. Мунилугу Аьрасатнал Архитектуралул академиялул жун цалчинсса кIану буллуссар. Къаши хъанан дикIай тай жула Лакрал театрданун тIий дурсса къатри жучIара къаличIаву, – тIий ур ХАжикъурбан.

Дагъусттаннай чIярусса лякъинтIиссар личIи-личIисса ябацIансса, авурсса къатри ХАжикъурбаннул проектрай дурсса. Махъсса шиннардий ляличIину гъира-гъавасрай дурсса даврин ккалли дай Дарбантливсса Табасараннал театрданул къатри. Аьрасатнал Архитектуртурал союзрал председатель Дарбантлив увкIсса чIумал: «Это же шедевр», – тIий, тамаша буллаи ивкIун ур. Мукунна ххаллисса проектрай буну бур «Лезгинка» ансамбльданул центр. Ва тIитIлатIисса чIумал шиккун бувкIсса Аьрасатнал Федерал Мажлисрал Федерациялул Советрал председатель Валентина Матвиенко: «Хъинну ххуйсса планировкалий дурсса авурсса къатри дур», – куну, лавайсса кымат бившуну бур авторнал даврин. НукIувагу кIицI лавгсса куцIуй, ХАжикъурбаннул проектирдай буну бур чIявусса мизитру. Каспийскалийсса Хъун мизит, МахIачкъалалив, шагърулува бувккун наниний Ухссавнил автостанциялул чулухсса КIяла мизит, Новый поселокрайсса, М. ХАжиевлул цанийсса кучалийсса ва м.ц.

Каспийскалийсса «Антарес» тIисса машлул центр, Каспий хъхъирил зуманивсса «Джами» тIисса туристгьтурал центр, МахIачкъалаливсса Машлул ва гостиницалул комплекс «7 небо», Каспий хъхъирил зуманивсса Щуссалакрал райондалул азархана – вай циняв ХАжикъурбаннул проектру. ЦIана буттал шяравун СунбатIлив буххайсса ххуллий ХАжикъурбан буллаи ур авурсса къапу. Ванал проектирдай дурсса къатри чансса дакъар цайми регионайгу: Чачаннаву, Абхазиянаву, Ставропольлал крайрай, Краснодардай.

ЦIана ва зий ур «Память» тIисса, Авгъан дяввилуи байбивхъуну, цинявгу локальный дявирдай жанну дуллуминнал аьпа абад буллалисса Республикалул мемориалданул комплексраха. Ва буллаи буссар Буйнакскалий. ХАжикъурбаннул давурттив цинявгу дур ябацIансса, цала хатI бусса. Укунсса даражалул архитектор жула миллатрая ушиву пахру бан бучIисса ишри.

Дагъусттаннал архитектура хъхъичIуннай давриву ванал захIматрал бутIа хъунмассар. Шагърулул кIичIираваллу, майданну чIюлу буллалисса къатри сагъну унува ванал цанна дацIан дурсса гъайкаллан ккалли дан бучIир.

1990-ку шинал ХАжикъурбан къамул увну ур СССР-данул Архитектуртурал союзравун. Ва хъанай ур Дагъусттаннал Хурматлувсса архитектор, Дагъусттаннал Хурматлувсса строи-



Бусравминная

Авурсса къатрайну абад дунни цалла цІа



тель. КИйла лайкъ хьуну ур искусствалул хьхьичІунсса ишккак-култран булайсса президентнал стипендиялун.

2006-ку шинал ХІажикъурбан кІава цала шярвучув Оьмаров Оьмар Мусаевичлушал гьуртту хьуну ур Болгариянаву шанна шинай цал шайсса хьинну сий дусса «Интерарх» (интернациональная архитектура) тІисса дунияллул халкъуннал дянивсса конкурсрай. Ва конкурсрай Дагъусттанная увагу вай КІягу ур гьуртту хьуну.

– Ттун хьунмасса пахру багьуна тикку шалагу дунияллийх цІа дурксса 14 архитекторнал стендирттаву жула лаккучув ХьурукІ-



Локальный дьэвирдай жанну дуллминнал аьпа абад буллалисса Республикалул мемориалданул «Память» тІисса комплекс



Табасараннал театр Дарбантлив

ратусса Абдулла АхІмадовлул стенд ккарккучун. Ва Туркманнаву хьунама архитекторну ивкІиссар. Туркманнал архитектуралул школалул гьану бивзанан ккалліссар. Сагьну унува ванащал кІул хьун, хьунаакьин тІайлабацІу хьуссар ттун, – тІий, буслай ур ХІажикъурбан.

Ва мукуна гьуртту хьуну ур Нью-Йоркливсса конкурсрай. ХьхьичІунсса кІану бувгьуну бур «Зодчество» тІисса гьарица шинах

Москавлів шайсса конкурсрай. Проектру даврицІун, ХІажикъурбан сурат дишаврихунгу агьну ур. – Уттиния тихунмай хьунасса Заннал ттунма итабавкъусса гьантрай ва давриха зун ччай ура, – тІий ур ХІажикъурбан. Къатрал мансардалией ванал тІивтІуну бур цанма дуссукъаттагу.

ХІажикъурбаннул мукъ-Хва оьрчІ бур. Вайгу циняв творчествалул агьлу бур. Цалчинмур душнил Анисатлул



Культуралул Дворец МахІачкъалалив

къуртал бувну бур Культурно-просветительское училищалул оркестровое отделение. Зий бур парикмахерну. КІилчинмур, Иза, ванал цала шаттирдайх лавгун, архитектор хьуну бур. Ва Каспийскалий Архитектурно-строительный колледжраву дарс дихьлай бур. Жулиана дизайнер бур. Ттатгал цІа дирзсса арс Иларкъади къуртал буллай ур Дагъусттаннал шярваллил институтрал промышленное ва гражданское строительстволул факультет. Заочнайну дуклай ур Дагъусттаннал университетрал

культуралул факультетрай. Зий ур Лакрал театрлану.

– Артистналмур пиша архитекторналмуньяр ялтту бувккунни арсनावу. Ттатталмур тунну ххишаласса хьунни, – хьярчлий ур ХІажикъурбан. Иларкъадинал ниттил ппу Абдулхаликъ Алимовлул хьунмур оьрму райондалул культурулул системалуву зий лавгун бур. Ванал хІасул бувну бур ца яла хьхьичІунмур художествалул коллектив, сакин бувну бур М. Чариновлул цІанийсса халкъуннал театр.

ХІажикъурбаннул къуш-



ХІажикъурбаннул дирхьусса суратру

ливу тачІав бухху-букку чан къашай. Хьамал ххирасса, ненттабакІ тІивтІусса, пиш-пиш тІийнмасса бур кулпат Залмугу. Аьчухсса, тІиртІусса дакІурдилгу, кулпатравусса нахІу-хІалимсса арардалгу кІункІу байхьунсса вайннал къушлийн барачат.

ВайгьантрайХІажикъурбаннул ВайкІицІ ларгунни увсса къини. Барчагу уллай, чІа тІий буру цІуллушиву ва дуллалимуниву тІайлабацІу. Къалешаннав виву тачІав творчествалухсса гьирагьавас.

Анриана АБДУЛЛАЕВА

Саратоврай – Дагъусттаннал музейрал выставка

Ларгсса нюзмардий А. Тахоттаннал Национал музейрал «Ттул Дагъусттан» тІисса цІанилусса выставка тІиртІунни Саратоврайсса Краеведениялул музейраву. Ва выставкалия балжину бувсунни Дагъусттаннал Национал музейраву зузисса элмийсса сотрудник, жулва лаккудуш Диана Оьмаровал.

Выставкалул экскурсиягу ваніл цилвар бувсса. «Жулла республикалул аьдатирттая, багубизулия, канил пагьмурдая, шанма мукъуйну учин, авадансса культуралия бусласисса выставкар. Гьашину Кулпатрал шингу духьувкун, Саратоврал агьулдануша хьунтІиссар, Дагъусттаннал культуралия бакъагу, кулпатирттал багьу-бизулия личІи-личІисса миллатирттал хьатІал аьдатирттаягу хавар ласун. Тайннал музейрал директор Евгений Казанцевлул выставка тІитІлатІисса



Диана Оьмарова экскурсия буллай

шадлугьрай кІицІ лавгуна жулва музейрашал уртакъну дуллалисса ва цалчинсса хьунмасса проект

душиву, гихуннайгу ва даву дачин дувантІишиву. Выставкалий уссия Национал музейрал дирек-

тор Пахруттин МахІаммадовгу. Ваналгу бувсуна Национал музейрал выставкартту дувайшиву билаятрал гьарцагу мурцІний, хьунмур мурадгу Аьрасатнал агьалинахь Дагъусттаннал миллатирттал культуралия музейрал хьус ккаккялун дишаврийну бусаву бушиву. ЧІявусса агьлу бавтІун бия выставкалийн. Чалай бия тай гьирарай тамаша бувну бушиву, гьан хьанай, суаллу буллай, цІухлай бия», – буслай бур Диана Оьмарова. Выставкалий гьуртту хьусса Саратоврал областьрал вивалил политикалул министрнал хьиривчув Тимофей Лешенкол Дагъусттаннаясса хьамаллурахь барчаллагь тІисса ихтилатраву кІицІ лавгунни областьрай хьоцІалунниха лирчусса миллатирттал культурулул ккуранну душиву, миннугу хьхьичІ ххуттай Дагъусттаннал халкъуннал культурулул центр бушиву. Саратоврай дуклакисса жулва

студентьтурал ниттил мазурдий бувккунни Расул ХІамзатовлул шеьрирду. Дунияллул халкъуннал дянивсса конкурсирттал лауреат Ххадиджат Ибрагьимовалгу бюххансса балайрду увкунни. Ккавказуллал халкъуннал къавтІавурттал ансамбль «Аьдатралгу» хьатІул аьдату ккаккан дуллалисса къавтІаврийну циняв шад бувшиву буслай бур Диана. Мияжаннугу, музейралгу, агьалиналгу дусшиврул ламу цІакь бувансса даву хьунни, дакІ ххари хьунни тайнначІа жулва агьалинал хІурматгу лахьсса бушиву ккавказкун. Гьарма хІурматрай зумух ласлай ия дагъусттанлултурал цІарду, тІаьнсса, ххуйсса ихтилатру чІявуя тІий бур. Ваніл бувсунни выставка апрель зурул 28-ннин дикІантІишиву. Саратоврай яхьанахьисса лакраша, уттинин ххал дуван къавхьхьурча, бюхьантІиссар выставкалийн гьан, шаппай бивсса кунмасса асардал дакІру дуцІин дуван.

ПатІимат РАМАЗАНОВА



Интниціунсса щугълурду

ЦИГЬИЛ КАМАЛОВ

Хъяврин шай ахъвазан

Хъяврин шай ахъвазан чъясса интниву,
Хавар бакъану тий аяз дякъия.
Вил пишгу ттун бия чІун дакъа интну,
Мюхчан къавхъуссияв чъясса ччаврия?

Ца аяз хъунача тай интнил гъантрай,
ТІутІивгу къатІ хъуна, марххала кунна...
Ахъулсса къашайсса щюллисса тІанттай
Вин язугъ шайривав? – Ттуй къавхъунахха!

Виримукъал буцай ттигу ттул яру,
Чъясса интту къатІ хъу тІутІив ккаккарчан,
Ина дакІнийн багъну, цІунил къюв дулай,
КІачІасса мурхъирайн я тІайла хъурчан.

Бюхъайхха, чІун ларгун, ттучІангу бучІан
Усттарсса, ххаллилсса ттула багъманчи.
Банхъуви жалгъагу, ахъулсса ххяххан,
Ина къакъан дурми къяртри къуркъуну.

КАЗБЕК МАЗАЕВ

ДакІний дакъар къужрангума
Лаккуйцири тІутІан цІарду.
Нарив дизав цІадакъултран
Щусса цІарду, вин цІа куну:
Ххирамунил мурччив-тІутІив,
Аъзизмунил яру-тІутІив,
Хъихъимунил хъяхъи-тІутІив,
Цамур бакъул кІаншилл-тІутІив.

РУСЛАН БАШАЕВ

«Лакку тІутІив» – тІисса къюмайлува

Ччиккул тІутІив

1

Къаччиссарив,
Ччиссарив
Зун чъясса
Ччиккул тІутІив?
Къаччихъурча,
Маччари,
Ччихъурчарив,
Мачча хъи,
Мачча хъи вай хъахъисса,
Марша бунийх хъахъисса,
Чирахъру лахълахъисса
Чъясса интнил тІутІашал,
Ччиккул ссайгъатиртгашал.

2

Ва баргъ шилли?
Интнилли.
Ва инт шилли?
Урттулли.
Уртту шилли?
Маршалли.
Марша шилли?
ТІутІалли.
ТІутІив шилли?
Ччиккулли.
Ччикку шилли?
Ччиналли.

Дараччи

Интнил накІливу
Ккарччив,
Исвагъийсса
Дараччив,
Бургъих мякъ дурксса
Лухччив,
Бургъийн ппай тІисса
Мурччив.



РАМАЗАН РАМАЗАНОВ

Интнил къини

Интнил къини кІюрххила
ЩяикІу шарашучІа,
Караматсса пахъдагъру
ЩядикІантІиссар вичІа.
ТІитІлайсса тІутІал къункъал
ДакІ куклу дувантІиссар,
ЗурзутІи хъхъемал кІунтІал
Мякъ вивун бутантІиссар.
Яргсса щюллишивруву
ОънтІуллив чІалантІиссар,
Ян буллай, бургъил тІинтту
Шикку тІитІи дакъайссар.
КІийнай ссавнийнгу ургу:
КІана лехлай барзугу,
Ххялайх яларай дучІлай
Хъюрухъ бавгъу ттурлугу.
Къакъунттул къакъабагу
РахІава баллантІиссар,
Къумасса пикрирдугу
Бакъа-къатІа хъунтІиссар.
Агъ, дуссарив цамургу
ТалихІ куннасса къини?
Духъурчагу, духъунссар
Ххаллилсса интнил къини.

СУЛАЙМАН МУСАЕВ

Хъя хъа цан чайривав интту ххуйтІутІи,
Къакъан тІий дунура гъинтнил бугъливу?
Щалла тІабиаьтран кІулну буну тІий,
Ссут ларгун, кІи ларгун, инт дучІайшиву.

Хъя хъа тІий жувагу личІанссару тти,
КІидачІин къахъанай дакІнил кІушиву,
КІулну тІий, гъанайна бунугу цІуртти,
Жулламур цІусса инт къадучІайшиву.

ИСМЯИЛ ХІУСМАНОВ

Къурату нанисса
Жегъир ххуллуву
КъавтІий най ххал хъувкун
Мюрш гъарал вирхху,
Махъ къабувсса мурчал
Щюлли бидавлий
Чарив ттун оърчІшиву
Нанисса ххива.
Зунттаву щюлли инт
Мяш тІисса кунма,
Пар кувкун ссавнилу
Ссурулкурттагу,
Хъурдай тІий хъулданун
Итталун багъну,
Ччиссагу ттучІанма
Нанисса ххива.

ИСЯ МАХІАММАДОВ

ХІакъинусса къинилул
Ххуйшиву, чаннашиву,
Мусил тІинттал мугъали
Ссавния бур экъинай.

Марч бур ттул вичІилухун
Цирив ца хавар буслай.
КІичІиртгавух бяшкІантту,
Балайгу тІий, экъинай.

Гъава ттислай лелуххант –
Къинибархан ссурулу,
Аършигу хъяй, хъя хъа тІий,
Интнил къанкъу ппив дулай.

Тийнмай мурхъру – вибуцІлай,
Аършарал хъазам цІупІ тІий,
Тракторгу авлахърай –
Интниха балай чичІлай.

МАХІАММАД ЩЕКЪИЕВ

ЧІиви оърчІал хияллу

Аман, инт дучІавивав,
Къув-аьс та учививав,
Щинал бярадавух занан,
Гъарах вичІилий шанан?

Ссав чІурдал дуцІививав,
ЧитІулт зана хъувивав,
Баргъ зунттухату личІлай,
Мюрш бяьли тІутІайх бичлан?

Нех зунттавату дурккун,
КуртІ къакъарду давивав,
Жул илтІа хъусса ттуккун
ЯтІул бюрув хъувивав?

СУЛАЙМАН ЧУГУЕВ

Хавардал бакІулух чанна къатлуву
Чаннасса хиялну ина къабивтун,
Зурул караматсса чаннал хъхъиривун
Навалу увхра на, хІасратту ларсун.

ГъукІуврал ва ларал къункъай шюршуну,
Зурулу пахъ дагъсса интнил хъхъуниву,
Шаттирдах ххядуклай паракъатшиву,
Най буру кІия чут – нагу, ттул дардгу.

Авлахърал битІанхърай чІиви шулгъину
Щана ттуна нава чІалай унугу,
Майданнив къагъайсса гъузилахъруну
Къявхъа тІий дур ттува пашманшивугу.

АМИНАТ АХІАДОВА

Инт барча дан кІюрххила
Ххяххабаргъ чантІ уквунни,
Гъили бургъил тІинтгашал
ЧивитІугу ивзунни.

Ххал барча – кІюрххичІунмай
Ахъувусса мурхъирдай
Челмултрал чІев-чІевлуха
Буссар щичІав къабаллай.


Инт дуркІсса ххаришиву
Цаннашал ца кІидачІлай,
ТІутІайх бивчу мурхъирдай
Челмулт бур ссувхІат буллай.

Бургъил чаннасса тІинттайх
Цаннил хъирив ца лехлай,
Буссар макъанну дуцІлай,
Цаннир ца магъирсса.

ЧивитІугу рязину
Уссар тамаша буллай,
Челмултраяр бюхттулну
Ххарил ур га леххавай.



Жижара

ЗАХАРДУЛ АРС
ХАДЖАЕВ АЛЬБЕРТ

Дагъусттаннал культурагу диялну мискин дурну, лавгунни дуняллия оьрмул 87 шинаву Аьрасатнал лайкъ хьусса художник, Захардул арс Хаджаев Альберт.

ГьунчукьатИрал шяраватусса цанихьсса тухумрал арс увссар Буйнакский. Къуртал бувсар тиккува Финансирттал техникум. Аьралий бурж биттур буллан Германнавун, Дрезден шагьрулийн, тIайла ацIаву ванал хьунмасса тIайлабацIулун ккалли бувайва, Дрезденнал галереялувусса суратирттай тамаша бувансса сант дагьну тIий. Аьралий бурж биттур буну махьгу, художникнал касму ххуйну лахьхьин, тийхва авцIуну ивкIун ур. 1962 шинал Дагъусттаннайсса хьхьичIвахьхьичIсса хьамитайпа-летчик Бавер Жяьпаровал оьвкуну, Ва-

тандалинай зана хьуну ивкIун ур ва. «Темп» тIисса (уттисса «Дружба») кинотеатрданул художник-рекламистну зий ивкIун ур. 1972 шинал къуртал буну бур Тгупли-сулал Художествалул академия, живописьрал факультет. Сурат дишаврил магьиршиву лахьлай ивкIун ур Гуржиял халкъуннал художник, цIа ларгсса профессор Саназел мастерскойлуву. Академия къуртал буну махь, ДАССР-данул Культуралул министрствалул тIалав уну, зий ивкIун ур Жамаллул цIанийсса Дагъусттаннал худучилишалул преподавательну.

Альберт Хаджаев Аьрасатнал ва Дагъусттаннал лайкъ хьусса художникри. Ванал цIа дуссар Германнаву итабавкъусса шалагу дуняллул художниктурал ката-лограй. Ванал наградарттавух дуссар Дагъусттан Республикалул ХIурматрал грамотагу, «За заслуги перед Республикой Дагестан» орденгу. ХIакьсса патриот, ниттил маз ва буттал улча майжаннугу ххирасса Альберт даКIнийхтуну ххарину икIайва ГьунчукьатIув, Лаккуй хьана-хьисса хьин чулийнайсса дахханашивурттая, цувагу шяраваллил оьрмул иширттавух чялишну хIала ухайва. Ва ия майжаннугу-сса интеллигент, ччимур темалия лавайсса даражаллий ихтилат бай-са дурккучув. Гьунар бусса унугу, бувагу пахру-ххара бакъасса, даКI-аьмал хьинсса инсан ия Альберт. ДаКIнийхтунусса къурчIишиву кIидачIлай, жижара буллай буру ванал кулпатрахь, душваврахь, цинявгу гьан-маччацIириннахь. Цув алжаннул ххари аннав, гьат-тай нур дизаннав!

ГьунчукьатIрал жямат

ИБРАГЬИМЛУЛ АРС
МАХIАММАДОВ
АНАС

Уттигьанну 52 гьантта кIицI лавгунни, мадарасса хIаллай къашавайгу ивкIун, апалухьхьун лавгсса, Карашрал шяраватусса Ибрагьимлул арс МахIаммадов Анаслу.

Анаслул цIа-бакI кIулссар Каспийскаллал шагьрулийсса хьинну чIявусса лакран. Ванал сайки шалва оьрму лавгссар «Дагдизель» заводрай зий.

Анас увссар 1936-кусса шинал Карашав. Буттал шяраву

школа бувккуну махь, 1957-ку шина шийнай, зий ивкIссар Каспийскаллал заводрай. Зийгу унува, заочнайну ккалай, 1964-ку шинал ванал къуртал бувссар Москваливсса Шалагу Союзрал машиностроительный институт. Заводрай ва зий ивкIссар: инженер-технологу, инженер-конструктору, секторданул начальникну, отделданул начальникну, хьунама технологул заместительну.

Цува зузисса кIанттайсса хьунмасса коллективрал ва хьуниминнал дянив мудангу лахьсса диркIссар Анаслул сий. ХIалал дурссар ванал чIярусса ХIурматрал грамотартту, медаль-лу ва барчаллагьрал чагьарду. Ца яла бусравсса ва махь нанисса чувну уссия Анас цала Карашрал жяматрал ва агьлу-авладрал дянивгу.

Цинявнанагу ххирасса жула Анас апалухьхьун лагаврил пашманшивугу кIидачIлай, даКIнийхтунусса жижара буллай буру ванал арснахь Ибрагьим-лухь, душваврахь Саняятлухь ва Сажибатлухь, арснал шарнихь Жамилатлухь.

Анаслул бунагьирттал аьпа баннав, рухI рахIатний дишин-нав, имандалий лавгун лякъ-иннав.

Карашрал жямат

ДаКIнин бичавурттава

Палестиннал дяъвилиясса
ца-кIива махь

На оьрмул 95 шинавусса, захIматрал ва дяъвилул ветеран, ХIукуматрал 6 медальданул заллу, политик-политолог, журналист, чичу акъанугу, «Лакрал къап – Къубиял къала», «Къубиял яхIлвтал», «Къубиял хьярчу» тIисса 3 жуж итабавкъусса инсан ура.

КIулну ура хьу-лухччив жухьра диркIсса чIунгу, ПачахIнал заманнайсса чIунгу, нитти-бутташар архIал ттукрай, балчаннай бакIлахьия ххилах-хисса чIунгу. Хьиннура кIулну ура, Хьун дяъвилул ккашил шиннугу. ЗахIматралмур къадругу кIул хьуну ура Къубиял 7 шинал школалий дуклакисса чIумала, 5-мур классрава ший-най къушлийсса давурттайну ва жяматрал ятту-гьаттарачIан заназийни. Арулва классу къур-тал буну, 12 оьрчIашар архIал, Хьун дяъвиллийн гьан бувсса ятти-хIухчалтран кIанай бадал-талну гьан багьсса.

ХIасил, 3 шинай хIухчушивугу дурну, ттула дуккаву шаллу дан увхссияв 1942 шинал Шурагьсса Дагъусттаннал 1-мур педучили-шалувун. Му къуртал байхту, зун ивкIссара буттал шяраву, Къубиял 7 шинал школалий. Микку зий унува, увчIунав шяравусса комсомолданул секретарьну. Шиккава партиалувунгу увххун, увчIуссара партбюрорал секретарьну. Таний ЦК КПСС-рал 1-ма секретарьну Хрущев ия. Ванал цIушиннарайну колхозирттал, совхозирттал партор-ганизациярттал секретарьтал зузи буну бия хьуниминнал хьиривчувталу «По культурно-массовой работе» тIисса цIанилу. Му цIушиннаравун агьунав нагу. ДаКIнийри ттула парткабинет лази-лакь буллай къабивтун, гьайтIалт зузисса кьурув лав-гсса чIун. ГьайтIалтрал цала дянивату личIи уну икIайва, оьрму яттича лавгсса 60 шинал оьрмулувусса МахIилавхьал МухIаммад. Оьрму лавгнугу, чурхал авкъат-сагьшивугу дусса ия. ХIухчалтрал бусаврийн буну, МухIаммадлул диКI шахла-хьисса хIухчил кIункIурдува гьа ялтту ларсун, тIаннул ккувлувун дуртIуну, хIачIайсса диркIун дур.

Кьурув ияйхту, МухIаммад игьалаган аннача тIий, муна-ша хьарасгу ларсун, гьайтIий унува, вагь-вагьлий левчунма бувкIуна къатталакьу Мани МухIаммадова. «Гьумуча хьун-сса къулдугьчи увкIун урча, ганал гьан бунна» тIий. УвкIун ия райкомрал орготделданул хьунама, ГьунчукьатIатусса Кьушкъунов Юсуп. Нава иян-нин тамансса коммунисталу бия бавтIун. Юсуплул бусуна цува учIаврил мурад. Тай шин-нардий Америка ва Израил ххявххун буссия Египетнай. Ванал жухь буссуна Дагъуст-тангу, Дянивсса Азиянавусса республикарттугу гьаз хьуну душиву данди бацIансса добро-вольщанал кьюкьри шаллу дул-лай. Буссуна Военкоматршалгу маслихIат ккавккун 4 инсаннал цIа: Вагьабов Оьмахан – пар-торганизациялул секретарь, Аьбдуллаев Басир – коммунист, шофер, Раджабов Зиябуттин

– шофер, ХIусайнов ХIусайн – захIматрал дарсирдал учитель. Юсуплул баян буну вай хьирив кьини Раджабов Зиябуттин шо-ферсса колхозрал машиналий, бучIан аьркиншиву Гьумучиял базар бишай майданнив, Ккул-лал ва Лакрал цацIусса митин-грайн, кIюрххил сьят 8 хьуннин. Хьирив кьини, кIюрххила, сьят 8 хьуннин, бивру жу 4 добро-волец.

Майданнул бакIрай лахьисса столгу бивхьуну, президиумраву бур шябивкIун кIирагу районда-лул Райкомрал ва Райисполком-рал хьунимигу, военкомталгу. Шикку бацIансса кIантту бакъа, лагмасса кIичIирттавугума бур бавцIусса агьали. Добровольцы шябивтунни цала-цала ккаккан бувсса машинарттай. ЧIунгу дур ахттая махьсса. Гьумуча бурув-гсса, гьарца шархьал хьхьичI, ПачахI-ххулуцIугу бур бавтIун агьали, цала-цала шяраваллава-сса добровольцы тIайла буккан бувкIсса. Хьиннува чIявусса Къубиял гаражрайну бия був-кIун. Къубиял гаражрачIан бивсса чIумал, гужсса гьаралгу ларчIунни. Цахьардал Къу-манивусса ламуйн бияннинсса ххулийх бивчуну бия хьунисса кьунтту-чартту. БацIан буну, машинарттугу, ккулал загь-лунасса оьрчIал кьуру битлай, неххавун бивчунни кьунтту. Ххуллугу тIивтIун, бавчун-ни хьхьичIунмай. Шурагьун бивсса чIумал ттул гьалмахтал, личIи буну, махьунмай гьан буну бия. Циван гьан бивсса-рив хIакьинугу кIулну акъара. ЧIалсса чIумал бивунав хьахьи кьундалул бакIурдил хьхьичIсса майданнив. Микку хьхьугу дур-тун, кIюрххила бизан буну, кьюкьрай бацIан бивсса чIумал, увкIунни чурххалгу лахь-лахьсса генерал громкоговорительда-нушал. Шикку ванал буссуна цукун-ссайн наниссаривгу. Шик-кува баян буну, зуйра-зуйрасса янна-усгу зула чантайрттаву дир-хьуну, цусса аьралий янна-усгу ларххун, булусса ярагьуннишал кьюкьрай бацIан аьркиншиву. Ялагу ххи буну, бюхьайсару тихун биянгу, ххуллия махьун-май зана-хьунгу куну.

ХIасил, най 3-мур хьхьуну бивунав АсатIиннал шяра-вун. КIюрххила бизан буну, бацIан буну строирай. КIава генерал, кIара громко-говорительданушал хьхьичI авцIунни. Бувсунни ххарисса хавар: «Америкагу ливхьун, Израилгу никирттай бивхьуну, зугу зула-зула минардайн, нитти-бутахьачIан, кулпатирттачIан, оьрчIачIан, гьанчувначIан наниссару», – куну. Ххари къав-хьуну бикIайххивав шаппа-шаппайн нанийни. Жула янна-усгу лаххан буну, аьралий ян-нагу ликкан буну, миччава итабавкъунав. На ливчIунав я янна, я ус дакъа. Миччава увчу-

нав МахIачкъалалийн. Микку саллатIнал казармалуву хьхьугу дуртун, вайра янналуву ита-авкъунав, 1 саллатIгу уллуну, ттунна янна-ус машан ласун тту-чаннай. Лаххансса янна-усгу ляркъуну, мигу ларххун, ттуй-расса саллатIнал яннагу ттуша-ла увкIсса ванахьхьун дуллуно, лавгссияв автостанциялийн. Мура кьини ивунав кулпатрал, оьрчIал, гьанчувнал ялун.

ХьхьичIунмай чивчумунил агьаммур мурадгу вари: ахир хIакьинугу найнмасса дяъвию, къатI хьуну нанисса Палестин-нал хьами, оьрчIру, чIявуми лихьчалтну нех дирхьуну Аьра-сатнавун нанисса, бакъассарив-къай ва дяъвилул ахир дишинсса гуж дуняллийсса бусурманнал ХIукуматирттачIа. Ва дяъви ххавахан бувсса Американал чапхунчитурахьгу, океанну, хьхьириду, хIукуматругу лав-хьун бувкIсса миннахьгу, мийх-ва бацIияра, Израильнахьгу къацIру башияра учинсса гужру буссарив? Шиккува учинна – бус-сар. Мунинсса жавабнугу хьа-нахьиссар, на хьхьичIунмайгу кIицI лавгсса куцуй, цинявп-пагу бусурманнал ХIукуматру ца мукьуйну ва иширайну гьаз шаву.

КIива ккаччи цаннишал ца биллаллийни, бух хьанахьимур лихьайссар, ххарххавух магьгу даркъуну. Мукун ливхьссар та шинал Египетнава Американал чапхунчиталгу, къацI бавшуссия Израилналгу.

ХIакьину ООН-гу, Гене-ральная Ассамблеягу бур Американал кIунттихьхьун лав-гун. Шикку гьаз буллаллисса масьаларттугу Американал бус-ласимур бачин буллаллисса бур. Жула муданасса вакил Небензал микку бихьлахьисса масьалартту цуксса вев-гьарайлий бихьлай унугу, гьаз буллайвагу бакъ-ар. Дуссия Совет ХIукумат – СССР, дуняллийсса капиталист ХIукуматирттай хьхьичI баруну хьанай диркIсса.

ХIакьину Аьрасатнал ХIуку-мат дачин дурну ур къанкъас-са, авторитетгу дусса, сийгу ларайсса лидер В. В. Путин. Ванал хьуннасса даву дуллай ур Украиннал националистъ-турашалгу, НАТО-лушалгу, Американал чапхунчитурашал-гу талай. Аьрасатнал Федера-циялувун къамул дурсса цусса республикартту ва областьру хьиннура рязину, куннишал кув даркъуну дур. Аьрасатнал Президентнал бувчIавурттай хьуннасса гьурттушинна дуллай бур. Хьинну рязину бур Путин-нул чулух бавцIуну, кIилчингу Президентну увчIуну.

На навагу, хьхьичIунайгу НКIицI лавгсса хьуначувнал Вагьабов Оьмаханлулу, кIул буллай ура ттула чIу буллши-ву Аьрасатнал Президентнал бувчIавурттай Путиннухлу. КIулнугу ура, мунашал нанисса кандидатъталгу ххуйсса ХIур-матрайсса давуртту дачин дулла-лисса депутатътал бушиву.

Оьмахан ВАГЬАБОВ

Баян

«Илчилий» бишлашисса барча бавурттал текстру буссар
«Илчунсса багьрал лагрулий:
укуннасса барча баву – 400 къ.
суратршалсса барча баву – 500 къ.

Лакрал халкъуннал учаларттава

Арс арчан – цала, душ барчан – ттул.

Ариухри лавсэсса тИий, ссахИван букан къабучИссар.

Асландалун диван бахЛи-ккаччихь буллали мабулларди.

Акълы я машин къала-сайссар, я бахлай къаби-Кайссар.

Акълукар пикри буллаи унува, авлиянал арсгу ай-ссар.

Акълы бусса арс – бутансса пахру.

Акълы, шиннардиву ба-кьарча, бакIравури бикIай-ссар.

Акълы бусса ххуллуд гьал-махчув бачИ ххуллу битавур.

Акълы – ссавурди.

Акълы бусса хIакин цал-цин цана цува хIакинни.

Акълы чIярусса шинну ху-миннаннир, чIявусса ккавк-нанни бусса.

Акълулуд дазу дуссар, ав-лияшиврл дазу дакъассар.

Акълулуд чув сях къаи-щайссар.

Акълукар аьтIутIини, авлия хьан икIайссар.

Акълулун илкинишуву ччи-ссар.

АкълукарначIа лахьхай-ссар, авлияначIа хьамабит-тайссар.

Акълукарнал лахьхийн байссар, авлиянал бизар бай-ссар.

Акълукаргу айкъайссар.



«Илчи» – маслихIатчи Зума дугъаврицIунсса маслихIатру



Дайдихьу №10

Най бур цIана, дянивун биявай, гьарцагу бусурманчувнан яла ххирамур, яла бусравмур барз. Шиная шинайн чIяву хьанай бур зума дугъагьми, жагьилминнавугу, бугьараминнавугу. Зума дугъаву бигьа даврил хIакъираву хасэсса пишакартурал тIимунциIун жувагу ххи буллалисса маслихIатругу бучИ лякъинссар тIий буру.

Рамазан зуруй дуркуну хьинмуния

Дукрардавух, бюхъавай, ишла дувара жучIанна гьансса аьршарай хьумур, жунна мач-часса лухччай яхьанахьими ятту-гьаттарал, аьнакIал дикI, неххал балугь.

Зума дургьусса чIумал организм марцI дуккан дувайсса сурсатиртавух дур накьлил уртту, ахьулсса ва ахьнилсса.

Чан дувара цIу-ярк чIявусса, хьиннура аьгьусса дукрарду. ЧIяру дувара накьру, гьивхьру, уртту-шинал ва ахьулссаннул чIяйрду. Хьамамабитару гьант-лун чара бакъа хIачIан аьркин-сса ххюва-ряхва стакан шинал хьирив лаян бувангу.

МарцI букканшиврул

Зума дугъагьмисса гьантрай канакимуниву дикIан аьркин-мунивух, организм марцI дуккан кумаг буллалимунивух дур ххишаласса, май, токсинну буккан буллалисса, дукра лялиян даврицIун кумаг буллалисса «детокс-шин»: цитрусрал ахьулсса (лимон, лайм, апельсин, мандарин) ва кьурчи ахьулсса (ягоды) дирчусса марцIсса шин. Шингу хIалучIира дукра дуркуну манзил лях лавгун махь, кун-нил хьирив кув ва хIала-ккала махIачIаванну, мадукаванну.

Детокс-шин му марцIсса хIачIай шинни, мюнпат ххи баншиврул ахьулсса ва ахьнилсса дирчусса. Укунсса шин дуван ишла буван бучИссар нисвартигу, суврарал ца-кIива чIапИ, лимон, кIяла жавж (имбирь), дарчиндалул ттархь (корица). Дичаймур хьхьурайра дирчуну, шиначалсса графин 10-12 сьятрайсса дюхлулсса кIанай ягу холодильникраву дитан аьркинссар, яни гьунттий ахт-такьуннай хIачIансса шин хьхьурайра хIадур дурну.

Организм марцI дуккан дуван ца яла бигьамур кьядану хьанахьиссар лимонгу дуртсса гьили шин хIачIаву.

Аьгъушивурттугу

Сси ххуйну зузи бавриву, организм марцI дуккавриву аьгъушиврул агьамсса даву дуллалиссар, мунияту аьгъушиврия махьаллил хьанан къааьркин-ссар. Ифтарданийнсса ссупра-лий чара бакъа дикIан аьркин-ссар лагаву, зайтундалул (оливковое), ницIай хьуварал (конопля) аьгъушиву, ятту-гьаттарал аьгъушиву (животные жиры), ккунук, гьивхь.

Гьутру-ттиликIгу, вихссакагу

ДикI дурагу къадукавугу заралли, чIярусса дукавугу заралли. Мунияту, дикIниргу къачанну канаки субпродукты (гьутру-ттиликI, ччарулли, кьюкI, ххютту). Шиву чIявуссар витаминну ва минераллу. Хьинну хьинссар бакI-шикIгу.

ТтурчIардил накьгу хIалал

Мюнпатсса дуки-хIачIиялуд ялуд бавцIуминнаву ялу-ялун машгур хьанай дур ттурчIардия дуресса накь (костный бульон). Зума дургьусса чIумалгу белокрал, аминокислотирдал, магнийрал, глициндаул бакIшарашину хьанахьисса ва бульондалиясса мюнпат-хайр биялсса буссар. Шивусса белок организмалуд лаласуншиврул накьливун ца-кIива кIунтI гьивчул ссиркалуд (яблочный уксус) бутIин маслихIат буллаи буру.

Ва бульондалией, укунна хIачIаву дакъассагу, личИ-личИсса накьру, ккурчру (каша) дувангу бюхълай бур.

**ХIадур бувссар
Бадрижамал АБЛИЕВАЛ**



Газета «Илчи» (Вестник)

Учредитель:
Агентство информации и печати
Республики Дагестан

Хьунама редактор:
Кьардашов Р. Аь.
Тел.: 66-00-59

Хьунама редакторнал хьиривма:
Башаев Р.М.
Тел. 66-00-59

Редколлегия:
Адамов АьбурахIман
МахIаммадович
Аьбуллаев Сапарбаг Аьлиевич
Аьлиев ХIажу Сулайманович
Исрапилов Артур Анварович
КьурбанмахIаммадов Чанкура Рама-
занович
Маммаев Сулайман
Нураттинович
МахIаммадов Юсуп ХIамидович
Хаппалаев Аслан Юсупович
Хасаева Гульшан Рамазановна
ХIажимирзаев Зиябуттин
Абусупиянович
Шалласуев Шалласу Рамазанович
Эльдарова Роза ХIажиевна

Отделлал редактортал:
Аьбуллаева А. П.
Аьдилов ХI. А.
Рамазанова П. ХI.
Тахакьаева З. К.

Корреспондентьгал:
АьбурахIманова З. Т.
Аьлиева Б. Д.
Саидова И. А.

Корректор:
АхIмадова А.И.

Кказитрал компьютерданул цех:
Абакарова К. Н.
ХIажиева З. У.

Кказитрай дурксса макьаларттава
кIицI лавгмур тIайлашиврул жаваб
дулайссар чивчуманал.
Редакция макьалалуд залуннал пикри-
лий рязину бакъахьурчагу, макьала
рищайссар, жьаматрал цаламур пикри
бусанссар тIисса ниятрай. Кказитрайн
дуркIсса макьаларттайн рецензия къа-
чичайссар ва ми залуннахьхьун зана
къадайссар.

Кказитр буккайссар ножмардий цал.
Шинай итабакьайссар 52 номер.

Кказитрал индекс. П7046
Тираж – 2002 экз.

Адрес редакции и издателя:
367018, г. Махачкала,
пр-т Насрутдинова, 1а
e-mail: ilchi@etnomediadag.ru
http://ilchi.info
Тел./факс. 66-00-59

Газета «Илчи» зарегистрирована
Управлением Федеральной службы
по надзору в сфере связи, инфор-
мационных технологий и массовых
коммуникаций по РД.
Рег. ПИ № ТУ 05-00424
от 30.04.2019


Газета «Илчи» отпечатана
в типографии ООО «Издательство
«Лотос».
367018, РД г. Махачкала,
Пр-т Насрутдинова, 1а
Срок подписания в печать 19.00.
Подписано 19.00.

Цена свободная



4 651116 280051

МАХIАЧКЪАЛА



Гьавалуд тагьар

